

Jondi Jesu'walaŋ mede hebiniŋ yobihikuk Yodakale Mede

Kayonbop hekidi Jesu Kilisto adi Wapumhik undun nadisukilitigin kan widihi tubukadaka tagin nai unanin pepa i youkin. Pepa yendi kayonbop nadisukilitihik tubukilitiune malabumun waphidi mu yehitubugweheyedok yeninkilitiguk.

Pepa yendok ginen nemek kougon mintawaak wendok yoyout mede fee hakiin. Nai unanin kayonbop hatigin adi yoyout mede u kedem binek nadidakalegin, inon kayonbop mu tina kaulehi hatigin heki adi tuwot mu nadidakalegin. Yoyout mede wendinin mebi adi indin. Jesu Kilisto adi Wapum, doktina Bepandi adi kohon folon memik hogohogok yapmeune yehiyalimonogofowaak. En Sadan maan undugon yalitifowaak. Jesu Kilistodi kwanainin tubudapmawaak, kan nai unanin metam nediyeŋ fafaŋe tina yali nadisukilitihik mu gweheyewaak, adi yadi tuwahik yembaak. Bepandi nemenemek hogohogok kobuli tubumintadapmawaak, nai unanin metam u Bepan gut malabumun nit mokit hatineen.

Mede Yodakale

¹ Jesu Kilisto'walaŋ mede hebiniŋ yobihikuk won adi nai muninin hinek nemek mintadok yonit u tipilapilaye-meniye yenindakale titindok Bepandi Jesu nimbihikuk. Kan adibo

anelonin ninikulune tipilapilaye-menin Jon nin-didime tuguk. ² Kan nubo Bepan'wala mede en Jesu Kilisto'wala yodakale mede kanadi tugutdi nadikwambunda yobihila youkut. ³ Kan kigili mede i kunayembaak nebe, be mede youkudip tinj u nadija nadidahija takalineen adi Bepandi kahan tiyembune kulemanjon hatineen. Biyagon kuyon, nai aganj muningon hinek tilak.

Yokahan dut Youtumba Mede

⁴ Nu Jondi Esiya kwetnen Jesu'wala Kayonbop 7 hatiin hiditok pepa i youhamulat. Hatigukdi hatilak tinja kotigon baak, adi'walaanin en munabuli 7 mapme pop namanda folon hatiin adi'walaanin, ⁵ en Jesu Kilisto'walaanin silon tobogon en kulemadi hidut youdihinit hatuwaak. Biyagon hinek, adigon Bepan'wala mede hogohogok yobune kwambundadapmalak. Tinja adigon kumun ginenin tububihila kaikaan pilakuk. Tinja undugon mapme kwetkwet hatiin'wala Wapumhik en Lolonit hatilak. Adi welesilon tinimiya nangatnjindi kadakanin ginenin nihikagiyali ⁶ Bepan'wala Hatihati Ungonin dinin Kayonbop nihitubu-mintaan, Beu Bepan dinin Silon Hemin dinin kwanai-me hatidok nininguk. Biyagon kuyon, adi'wala wougigit hautanit en sanjinin wapum hatakdi haliwoon halaak fafajenin. U biyagon.

⁷ Abe nadiin! Adi mulukwan ginen baak kan meenin hogohogok dauhikdi kaneen. En bohomdi yout tigin hekidi maan kaneen. Meenin bop hogohogok kwetkwet hatiin adi aditok tinja

kobulabulaye tineen. Mede yon adi biyagon hinek. ⁸ “Nu nagon timen hatigutdi mindan hatibaat.” Wapum Bepan, Sanjin Molomdi undun yolak, adi hatigukdi hatilak. Biyagon hinek, adi yadi nemenemek tububihila tubumintagukdi kaugon kotigon baak.

Jon adi dawi tombune Bepan’wala kudi hebinin kaguk

⁹ Nu nohik Jon. Indi Bepan’wala hati-hati ungon kahileen nongon hatiyam, tin Jesu’wala kayonbop doktin mik-kwadi ginen folofigita wala nadinila gigne tin hatiyam. Ingon on, nu Bepan’wala mede, en Jesu wou yohautagut doktin kwet kambangit Patmos unon napmeune itougut.* ¹⁰ Ala Wapum’wala nainin (Sonda) nin folon Ungon Munabulidi saninin nit hinek fotokinambune ila nadiwene sigine folon hinek aigon mede wapum bai gigilit nabugon mintaune ¹¹ mede indin nadigut, “Nemek yabulan u pepa ginen youla Kayonbop 7 yendok boiyembune uneen. Efeso en Simena en Pegamam en Tayataila en Sadis en Filadelfiya en Leodisiya.”

Jondi Jesu’wala folonamandap kaguk

¹² Kan nu me mede naninguk adi kawit yona fambekenegut. Fambekeneen kaman boidok kwehik 7, goldi tigin, yabugut. ¹³ En kaman boidok kwehik lekingon folon nin yalune kagut adi Me Kobumun nabugon. Dahidahin

* **1:9:** Jondi mede yobihit i youkuk adi Patmos agan bikabuna kwet wapumnen hatina youkuk.

kweheyenin dahiune foon kayon kufuladapman tuguk. En siyo folon kiyegelep goldi tigin youk-iliguk. ¹⁴ Mebi en mebi hampun adi fafau niyaniyan. En dawiyat adi kudupmebem nabugon. ¹⁵ Kayonyat adi ain kudup ginen dafafanen diwein nabugon. En mede yoyonin adi ime ham ginen bemkula imeham tolak nabugon. ¹⁶ Kohon didimenin di hinantilamek 7 boi yakuk, en manin ginanen miknon mikit hinek nin manin fukufukun imikimikiyenitdi fonduhuna yakuk. En namanda adi mele fafafenin diwelak undun nabugon hautaguk.

Kumuŋa kaikagukdi Jon niwihiguk

¹⁷ Nu folonamandanin undinin kan heben folon maan kumun ti hakiin nabugon dahakut. Dahatuwene kohon didimenin di foloone folon kamen indin naninguk. “Du munta mu tiben. Timen hatigutdi mindan hatibaat ¹⁸ tinŋa hatihati molom, na inakon. Indin nadiwen. Nu kumuŋa kaikagutdi kaipmun hatiluwaat. Nin i nadi. Kumun en ham dinin talik tehep’walaŋ yeme youdilitom u nu kamehatilat. ¹⁹ Ale du nemek mintaguk kaŋaŋ, be indidegon mintalak, be mindan mintawaak u wanaŋ youdapmawen. ²⁰ Tinŋa kohone didimeninŋenŋkade hinantilamek 7 en kamaŋ boidok kwehik 7 goldi tutumbanit wanaŋ yabaŋaŋ wondinin mebi ganimbe nadiwen. Hinantilamek 7 uyadi Kayonbop 7 adi’walaŋ aŋelo, en kamaŋ boidok kwehik 7 uyadi Kayonbop 7.”

2

Efeso Kayonbop mede kameyemguk

¹ Me wendi koti tomboyoula Jon indin ninjuk. “Efesohi Kayonbop’walaŋ aŋelohikdok mede indin youlenj. Hinantilamek 7 kohonj didimeninji mongola kamaŋ boidok kwehik 7 goldi tinjit lekinjonhik ginenj unambunat tilakdi hiditok indin yolak. ² Nu titinhikdok, be kwanaihikdok, be fafaŋehik dininj mebi a nadilat. Hidi yadi me kadakahi yabukabeleenj biyabu mu tiinj. Undun doktina me nolidi inde aposel yona yalaŋ yobune yalaŋ medehik dininj mebi tubudakalejin. ³ Tina fafaŋe tina hatinila nutok tina mik-kwadi ginenj folofigita nadinila nadigweheyenit mokit hatiginj. ⁴ Ingon on, nu yadi nemek indin doktina hiditok nadiwene yomnit tilak. Hidi timenj nutok mohinek nadinamginj ingon kobuk indinde wondok tuwolit mu nadinamiinj. ⁵ Koom fafaŋe tina hatiginj ingon nai indide adi gweheyeenj fofonj tiinj. Ale hidi wendok nadisuŋa welehik tubutakaleenj titinhik koom tiginj u kotigonj tineenj. Undun mu tineenj adi nu busuwaanj kamaŋhik holomtibaat. Biyagonj kuyonj, welehik mu tubutakalenenj adi unduku tibaat onj.

⁶ “Ingon titinhik ninj tubune utumba tilak uye indin. Nikolas menjimeniyedi nemek tubune yabuŋa nadikadakainj wondok adi nu maan un-dugonj tilat. ⁷ Munabulidi Kayonbop mede yenilak uyadi nebek ninji nadidakalewe kanj magi baigonj kametnadina nadiwaak. Undun doktina meeninj ninj adi kwanai fafaŋe tina titawoonj tubudapmaune Bepaŋ’walaŋ fiye momoonj* ginenj

* **2:7:** Bepaŋ’walaŋ fiye momoonj wou Gilik mede ginenj adi “Paladais” yoinj.

hatihati bem dinin foloon mintalak u nanandok kedem nindapmawaat.”

Simena Kayonbop mede kameyemguk

⁸ Me wendi koti tomboyoula Jon indin ninguk. “Simenahi Kayonbop’walaŋ aŋelohikdok mede indin youlen. Timen hatiguk en mindan hatibaak tiŋa kumuŋa kaikagukdi hiditok indin yolak.

⁹ Hidi mik-kwadi tihambune ikulema mu tiŋa fiyewakahi hatiin u a nadilat inŋon oŋ, kunum ginen hidi’walaŋ bombon fee ihamiin. Tiŋa unduŋon Judame nolidi mede kadakanin haniŋa hanintifoŋ u maan a nadilat. Ala adi yadi Judame hinek moŋ, adi yadi Sadan’walaŋ metamjiye.

¹⁰ Hidi yadi nemek manin mikit kotigon mintahambaak wondok munta mu tiyaneen. I nadinen, Sadan adi tikamanda tihamdok hidi’walahi me noli yot fafaŋenin ginen yapmewaak. Kaŋ hidi’walaŋkade mik-kwadi melenai 10 mintawaak. Inŋon oŋ, hidi yadi Bepaŋ’walaŋ mede didimeningon kamehatigene kumumbune hatihati fafaŋenin dinin kulun tehindilendilenitdi mokohambaat.

¹¹ Munabulidi Kayonbop mede yenilak uyadi nebek ninŋi nadidakalewe kaŋ magi baigon kametnadiŋa nadiwaak. Unduŋ doktiŋa meenin nediyen kwanai fafaŋe tiŋa titawoon tubudapmawaak adi yadi kumuŋ fafaŋeninŋi mu tubukadakawaak.”

Pegamam Kayonbop mede kameyemguk

¹² Me wendi koti tomboyoula Jon indin ninguk. “Pegamamhi Kayonbop’walaŋ aŋelohikdok mede indin youlen. Miknon manin fukufukun mikit

kamehatilakdi hiditok indin yolak. ¹³ Hidi yokwet hatiin, wendinin mebi a nadilat. Unon adi Sadañdi yolikweli tuguk. Kan hidi adigili nutok tinã medene didimeningon kame hatiin. Nu'walañ mede tilolon mohinek tuluguk, notne momoon Antipas, adi yohikwehik Sadañdi itoulaknen ungon hinek-ku ukin, kan hidi nai unaningon nu nadisukilitinamunã gweheye mu tigin. ¹⁴ Ingon on, nu hiditok nadiwene kabe-tuwot mu tilak. Hidi'walañ yohikwehinen meenin noli hatiin, adi Balamdi tuguk undun tiin. Balam adi indin tuguk. Balakdi Isilae metam yehitubu-kadakadok nadinã Balam nimbune Isilae metam yenihohokeneune nemek welewele boinã Bepañ yonã bepañ yalayalan muni heyemagin. Undun tinã siloda en kefile kwanai tinã kadakagin. ¹⁵ Ala hidi'walañ yohikwehinen meenin noli adi Nikolas menimenjiye'walañ titin u keleen tiin. ¹⁶ Undun doktinã hidi welehek tubutakalenen. Biyagon hinek kuyon, hidi undun mu tinen adi nu pilap hinek bunã meenin undihi mane dinin miknon mikitdi widihiwaat. ¹⁷ Munabulidi Kayonbop mede yenilak uyadi nebek ninđi nadidakalewe kan magi baigon kametnadinã nadiwaak. Meenin nin titin fofoon giginẽ tinã titawoon tubudapmawaak adi yadi mana† hebinin mintoiwaat. Tinã nin indin, kawade fafau mimbaat. Tinã wou kobuli ungon youle halune molom ne kubugonđi kan nadiwaak."

† 2:17: Mana adi nananje Bepañdi Isilaehi kwet filen yemtoiguk. Kahat u Kisim Bek 16 ginen kunali kakanđok.

Tayataila Kayonbop mede kameyemguk

¹⁸ Me wendi koti tomboyola Jon indin ninguk. “Tayataila Kayonbop’walaŋ aŋelohikdok mede indin youleŋ. Bepaŋ’walaŋ mihi, dawi kudupmebem nabugoŋ, eŋ kayoŋ ain kudup dafafaŋeŋ giminiŋ diweiniŋ nabugoŋ, adi hiditok indin yolak. ¹⁹ Nu titiŋhik diniŋ, be welesiloŋhik, be nadisukilitihik, be kwanaihik diniŋ mebi agaŋ nadilat. Tiŋa folofigita mintahambune gicine tiŋa fafaŋe tiiniŋ diniŋ mebihik maŋa a nadilat. Tiŋa koom gicine tigiŋ iŋgoŋ kobuk adi gicine hinek tiiniŋ, u agaŋ nadilat. ²⁰ Iŋgoŋ oŋ, indin doktiŋa nu hiditok nadiwene kadakalak. Hidi tam Jesebel kakabeleŋ bikabune adi “na polofet tam” yoŋa nu’walaŋ metamneye yenihohokeneŋ mede yeniyehitubu-didimeune bepaŋ yalayalaŋ’walaŋ hinamuni tiŋila siloda kadakaniniŋ tiŋa kefiŋfile kwanai tiiniŋ. ²¹ Adi yadi weliŋ tubutakaledok nai timiŋgut, iŋgoŋ oŋ, adi weliŋ tubutakaleŋ siloda tiŋa kefiŋfile kwanaininiŋ bibiŋdok mu yolak. ²² Nadiiŋbe? Nu wendegoŋ tiŋa yobene yagit fafaŋeniŋ mintamimbune halaak, eŋ adut kefiŋfile tiiniŋ adi yadi yagit folofigita kisaŋ mintayembaak. Tam wendi’walaŋ titiŋ hogoli mu wabineŋ adi unduku tiyembaat oŋ. ²³ Tiŋa wapmihiŋiyedok yobene yagit fafaŋeniŋ tiŋa kumuneŋ. Unduŋ tibene yokwetkwet kayonbop adi nu adi’walaŋ welehiŋ diniŋ mebi nadidapmalat u nadidakaleneŋ. Nu meeniŋ wanakaŋ titiŋhikdok kibikoŋ tubu-udanehambaat.

²⁴ “Tayatailahi meeniŋ noli hidi yalaŋ mede u sigilulum timiiniŋ, tiŋa meeniŋ nolidi Sadaŋ’walaŋ

mede nadihinakayam yoiŋ, adi mu yehitomboy-oukiŋ, hiditok indin yobe nadinenŋ. Nu hidi nemek malabumuŋ noli nemu hamulat. ²⁵ Unduŋ doktiŋa nemek u be u hahamulak u gitagoŋ boi-hatilune busuwawaat. ²⁶ Meeniŋ niŋ adi fafaŋeŋ nu nadilat u titawooŋ tubudapmawaak, adi yadi nu saŋiniŋ mimbene ²⁷ tot fafaŋeŋ maliŋa meeniŋ Judahi'walaŋ feknit mokit kwetkwet hatitawiŋ hati yehitubu-didimeŋ yabudokowaak. Tiŋa nemek kwet kabot nabugoŋ upupuheneŋyam unduŋ tiyembaak. Nu batnedi saŋiniŋ namuŋguk unduku aditokbo mimbaat. ²⁸ Tiŋa bamholiŋa wapum maan tomboyoula mimbaat. ²⁹ Munabulidi Kayoŋbop mede yenilak uyadi nebek niŋdi nadidakalewe kaŋ magi baigoŋ kametnadiŋa nadi-waak.”

3

Sadis Kayoŋbop mede kameyemguk

¹ Me wendi koti tomboyoula Jon indin niŋguk. “Sadishi Kayoŋbop'walaŋ aŋelohikdok mede indin youleŋ. Bepaŋ'walaŋ Munabuli 7 eŋ hinantilamek 7 yabudokolakdi hiditok indin yolak. Nu titiŋhik diniŋ mebi a nadilat, meeniŋdi habune kaipmuŋ hatiŋ nabugoŋ tilak, iŋgoŋ welehiŋ adi kumiŋ. ² Unduŋ doktiŋa hidi kaikaan pilali titiŋhik hahamulak u tubufafaŋeune undugoŋ hatuwaak. Nadiiŋbe? Nu Bepaŋ'walaŋ namanda foloŋ titiŋhik kawene tuwot mu tilak. ³ Hidi yadi nemek hamuŋjit be hanihehitubu-didime tiŋit, u tubukaikaan gitagoŋ moŋgo hatiŋa welehiŋ tubutakaleneŋ. Mu pilali hatineŋ adi

kubomedi busuwain nabugon busuwahambaat. Biyagon hinek kuyon, hidi yadi naine kabe-nemu nadilune busuwahambaat. ⁴ Sadis yopman unon mehimehiye noli hatiin, adi yadi dahidahihik dagik mu tigin. Ala undihi adi kaugon hati-gene dahidahi fafau dahina nukut hatineen. Adi yadi undun tiin doktiha nadiyembene utum-balak. ⁵ Meenin nin adi fafane kwanai tita-woon tubudapmaune dahidahi fafau mimbene dahiwaak, en wou hatihati fafanenin dinin pepa ginen hatak u mu tumolokulaat. Mon. Nu yadi wou Batne'wala namanda folon en anelonje namandahik folon yohautawaat. ⁶ Munabulidi Kayonbop mede yenilak uyadi nebek nin di na-didakalewe kan magi baigon kametnadinha nadi-waak."

Filadelfiya Kayonbop mede kameyemguk

⁷ Me wendi koti tomboyola Jon indin ninguk. "Filadelfiya Kayonbop'wala anelohikdok mede indin youlen. Biyagon hinek kuyon, hatihati ungonin molom en mede biyagon molom, Dewit'wala yeme youdilitom kamehatina talik yeme dilitombune nebek nin di tuwot mu tehewek, be youkilitiune nebek nin di tuwot mu dilitombek, adi hiditok indin yolak. ⁸ Nu titinhik dinin mebi a nadilat. I nadinen! Nu namandahik folon talik tehup nin dilitom hamungut u nebek nin di tuwot mu tehekilitihambaak. Hidi'wala saninin kuyanin-kabe hatak u agan nadilat, ingon on, hidi fiit wotnenegigit gigne tiha didimeningon kamehatigin. ⁹ I nadinen, Sada'wala mebop nin adi yadi Judame foloon

hinek mon, foloonnit mokit hatiŋila yalan yo hatiŋ, ale nu yeninkule hidi'walaŋkade woon mulelem tihamuŋa, nu menot tihamgut wendiniŋ mebi nadineen. ¹⁰ En hide yadi nutok gweheye mu tiŋa fafaŋe tiŋa woomnamdok haningut, u didimeningon kamehatigin doktiŋa nubo tikamanda nai wapum folon hehitubulodawaat. Tikamanda uyadi kwetkwet meeniŋ hatitawiŋ wanaŋ mintayembaak. ¹¹ Nu adi pilap baat, doktiŋa hidi nemek monggo hatiŋ u fafaŋeningon boikilitiŋa hatilune nebek niŋdi kulunhik tehindilendilenit u mu holomtibaak. ¹² Meeniŋ niŋ adi fafaŋe kwanai titawoon tubudapmawaak adi yadi Bepaŋ ne'walaŋ Silonyot diniŋ taka kobumun kambiyale fafaŋeniŋ yalaak. Tiŋa adi folon Bepaŋne'walaŋ wou youlaat, en Bepaŋne'walaŋ yolikweli wou u maan adi folon youlaat. Uyadi Jelusalem yokwet kobuli kuyon, kunumneniŋ Bepaŋne'walaŋniŋ fowaak. Tiŋa nu na'walaŋ wotnene kobuli maan adi folon youlaat. ¹³ Munabulidi Kayonbop mede yenilak uyadi nebek niŋdi nadidakalewe kaŋ magi baigon kametnadiŋa nadiwaak.”

Leodisiya Kayonbop mede kameyemguk

¹⁴ Me wendi koti tomboyoula Jon indin niŋguk. “Leodisiya Kayonbop'walaŋ aŋelohikdok mede indin youlen. Mede biyagon molom, en yohauta foloon, en yofafaŋe tilak adi yadi Bepaŋ'walaŋniŋ nemenemek mintaguk wondiniŋ mebi ki hati-lakdi dutok indin yolak. ¹⁵ Nu titiŋhik diniŋ mebi a nadilat. Hidi gweheyenon mu hatiŋ,

tiŋa undugon fafaŋeniŋgon mu hatiin u nadi-lat. Gweheyenŋon be fafaŋeniŋgon hatibe nadiŋa undun hatinen on! ¹⁶ Gweheyen en fafaŋeniŋ lekiŋgonhik folon gwehe-gweheyenŋon hatiin doktiŋa mane gineniŋ hehimadikulene foneen. ¹⁷ Hidi hidetok indin yoin, “Indi duhuduhu fee itnimiin, indi nemek lufomgon mu tiyoukumun. Undun doktiŋa nemek nemu lohineem.” Hidi mebihik tuwot mu nadiin, tiŋa ganiŋginek, fiye-wak, hambeep, dauhipmik, en hambiyek hatiin, u mu nadidakalein. ¹⁸ Ale hanimbe nadinen! Nu’walaŋ gol, kudup ginen daan walanda hinek tuguk u tuwaan bombonnit tineen, en dahidahi fafau tuwaan dahiune foon mekahik kufulahe-baak, tiŋa dauhik dinin haguwo tuwaan dauhik youtela diwehautaneen. ¹⁹ Nu me yabukahile tilat adi yenindidime en udihiŋa yehitubu-didime tilat. Undun doktiŋa hidi yadi gigne tiŋa wele-hik tubutakalenen. ²⁰ I nadinen! nu wele-hik dinin yeme siginen yali youtnadilat. Ala nebek nin adi medene nadiŋa yeme dilitom-nambune adi’walaŋ welen maanen foon adut ipilat tiŋa nanaje nademeet. ²¹ Nebek nin adi fafaŋe kwanai titawoon tubudapmaune nubo ni-hamanewe mapme pop folon ıla metam yabu-ulidoko kwanai nonŋon tidemeet. Na maan undugon fafaŋe kwanai titawoon tubudapmawene Batnedi ne’walaŋ mapme pop ginen iitdok n-ninehimaneguk. ²² Munabulidi kayonbop mede yenilak uyadi nebek nin di nadidakalewe kan magi baigon kametnadiŋa nadiwaak.”

4

Jondi Bepañ'walañ kweli kaguk enj tonadifo kap nadiguk

¹ Nu nemek u kanadi tubudapmaan daune diween kunum ginen talik yeme nin hamap yalu kagut. Tina mede koom bai gigilit nabugon nadigut wondigon kotigon mintaan indin naninguk. “Du inon labune kougong hatigene nemek mintawaak u ganindakalewene kawen.”

² Undon yobune unaningon Ungonin Munabulidi sanininjit hinek fotokinambune kunum ginen mapme pop nin ikuk, wendok ginen Me nin ilu kagut. ³ Tina mapme pop ginen ikuk adi'walañ folonamandap adi hayaña nabugon ala giminda walawalañ hinek. En pop bokinen adi kwembeke kudidi kelemadiguk, folonamandapnin kaikailen en walañ hinek.

⁴ En mapme pop wapum kelemadina mapme pop kuyahi 24-yen ilaugin, kan wendok ginen talitimen 24-yen ilaugin. Adi yadi dahidahi fafau hogohogok dahina ikin, en kulunhik tehindilendilenjit goldi tutumbagin u mebihik folon udiyen ikin. ⁵ Kan pop wapum ginenin maninguhut* en filimpit tina munkulap gibitan toguk! En pop tehindilendilenjit heben folon kudupmebem 7 yadagin. Uyadi Bepañ'walañ Munabuli 7-di danegin. ⁶ Tina undugon pop tehindilendilenjit namanda folon imengwan galasdi tinjit nabugon walañ hinek nin hakuk.

* **4:5:** Bepañ'walañ mede sanininjit wondinin mebi yobihitak.

Kaŋ pop tehindilendileŋnit heben foloŋ nemek hatihatihinit 4-yeŋ ikelemadigŋ, adi yadi hebe-hinenkade be sigihinenkade dauhik hogohogok ikelemadigŋ. ⁷ Niŋ adi laion nabugoŋ, eŋ niŋ adi makau maaniŋ nabugoŋ, eŋ niŋ adi namanda meeniŋ nabugoŋ, eŋ niŋ adi baŋi suwaye wole tilak undiniŋ. ⁸ Nemek hatihatihinit 4 adi hogohogok adi papalihik 6 hogohogok, tiŋa undugoŋ papalihik wahinkade be hapmenenkade dauhik hadapmaguk. Kaŋ helebufa tuwot, indiŋ kutigiŋ, “Wapum Bepaŋ Saŋiniŋ molom adi yadi uŋgoŋiŋ, uŋgoŋiŋ, uŋgoŋiŋ hinek, hatigukdi hatilak eŋ kotigoŋ baak.”

⁹ Biyagoŋ kuyoŋ, nemek hatihatihinit 4 adi Hatihati Fafaŋeniŋ Molom, pop tehindilendileŋnit gineŋ itak adi niutumbe eŋ tonadifo timiŋ. ¹⁰ Adi unduŋ tulune talitimenŋ 24 adi yehitomboyoula Hatihati Fafaŋeniŋ Molom pop tehindilendileŋnit gineŋ itak adi’walaŋ heben foloŋ duwokeneenŋ nintiŋalooŋ popŋiŋ mebiyeŋ kulunghik tehindilendileŋnit udila boiŋa indiŋ yoiŋ,

¹¹ “Wapumnik Bepaŋ, tinahukut kinonom, eŋ woho wapum eŋ saŋiniŋ uyadi da kahileune tuwot hinek tilak. Biyagoŋ hinek, dagoŋ nemenemek tubuminta-dapmaguŋ eŋ du’walaŋ mede doktiŋa nemenemek mintadapmaguk hatak.”

5

Pepa bilibetnit niŋ nipmekdi galikilitinit

¹ Kaŋ mapme pop gineŋ ikuk adi kohon gineŋ pepa bilibetnit niŋ kame ilune kagut. Pepa

wonj adi siginenkade be hebennenkade wanan kudinit hakuk, tinja nipmek 7-di galikilitinjit. ² Kanj anelo sanininjit kagut, adi mede indin kutifiyeen yohautaguk. “Meenin nebek didimenin hinekdi nipmek kibidakula tanakiyeune tuwot tibek.” ³ Undun yobune kunum folonj be kwetfolonj be kwet falipmenj nebek ninji pepa nipmeknin kibidakula kakanjok be yokunatdok mu lodaguk. ⁴ Tinja nebek ninji fifigonj nemu hatinja pepa u tanakiyeen yokunakuk doktinja bulaningon nadinja kisanj kokut. ⁵ Undun tibene talitimenj heki adi’walaanin ninji indin naninguk. “Biyagonj hinek, makat mu kolenj, binja i nadiwenj. Juda’wala yalakinije’walaanin laion nin mintaguk. Mapme Dewit’wala yalakinin ninji me mikniye yehiyalitifoon fafaneguk doktinja adi pepa nipmek 7-di galikilitiginj u kibidakula tanakijedok tuwolit tilak.”

Jondi Dompa Mihininj kaguk

⁶ Kanj nu daune diwenj mapme pop enj nemek hatihatihinit 4 adi’wala lekingonjhik ginenj enj talitimenj hekidi yakelemadi tiginnenj ungonj Dompa Mihininj ninj uut tinjit nabugonj yalu kagut. Keleu 7, enj dawu maan undugonj 7. Dawu 7 uyadi Bepanj’wala Munabuli 7, adi yadi kwetkwet yeningkulinjit hatitawin. ⁷ Kanj Dompa Mihininji woonj mapme pop ginenj ikuk adi’wala kohonj didimenin ginenj pepa bilibetnit hakuk u tiguk. ⁸ Pepa bilibetnit u tibune nemek hatihatihinit 4 enj talitimenj 24 adi Dompa Mihininj’wala hebenj folonj maan foon duwokenegin. Adi hogohogok adi baiwagimhinit, enj malin goldi tinjit

u wanan yohoneen dahakin. Malin maanen adi hemundumundune momoon dinin mupmuk labuguk, uyadi meenin Bepan nadisukilitimigin adi'wala ninadi. ⁹ Undun tinja adi kap gitipmun nin indin togin.

Dagon pepa tinja nipmek kibidakulune tuwot hinek tilak. Du gulune nangatgedi kwetkwet meenin folonamandap ungonin ungonin, en mede walinin ungonin ungonin yehisidokoune Bepandok gigit tigin. ¹⁰ Undun tinja yegun e' yehibopneune Bepan'wala yokwet momoon dinin Kayonbop en silon kwanai dinin talitimenjiye mintagin. Ala adi kwetfolon mapme mintaan metam yabulidoko kwanai tineen.

Kunum ginen tonadifo wapum mintaguk

¹¹ Ka nu daune diwen ajelo mohok fee muyen hinek yabuna mahik gigit maan nadigut. Adi yadi mapme pop en nemek hatihatihinit 4, en talitimen heki yehikelemadina yakin. Kunakunat indin yali ugin: 10 tausen mohomohok, en 1 miliyen mohomohok yali ugin. ¹² Tinja gigit wapum toja indin yogin, "Dempa Mihinin uut tinj it adiyen sanjin lolonit, en nadinadi fulin, en fafane, en wou wapum, en nemenemek kinonom en yopilapilaye, nemenemek momoon hogohogok i adi kahileune tuwot hinek tilak."

¹³ Ka kunum ginen, be kwetfolon, be kwet falipmen, be imengwan ginen nemenemek hati-taugin hogohogok adi indin tobu nadigut.

“Mapme pop ginen itak en Dompa Mihinin adi wanaŋ yopilapilaye, en wohikgigit wapum, en wohikgigit hautanit, en saŋinin lolonŋnit hayemilak wondigon fafaŋenin hayemiluwaak.”

¹⁴ Kaŋ nemek hatihatihinit 4 adi yogin, “U biyagon.” Kaŋ talitimen hekidi maan duwoke-neen hali niutumbagin.

6

Kale wosi 4 adi’walaŋ mede

¹ Kaŋ nu daune diween kagut, Dompa Mihinŋdi pepa nipmek 7-di galikilitigin u kubugon nin kibidakukuk. Kibidalune nemek hatihatihinit 4 adi’walaanin nŋdi munkulap nabugon kutiŋa yoguk. “Beŋ!” ² Yobu yali kawene kale wosi fafau nin labuŋa buguk. Sigin folon me nin ikuk adi yadi tebeniŋnit, tiŋa mapme dinin saŋinin wapum u mimbune mikme mintaan uune nemene-mek hogohogok saŋininhinit adi, adi’walaŋ falipmen udapmagin.

³ Kaŋ Dompa Mihinŋdi nipmek galikiliti 2 u kibidakulune nemek hatihatinit kunakunat 2-di kutiŋa yoguk, “Beŋ!” ⁴ Yobu yali kawene kale wosi giminin wiŋ hinek busuwaguk. Sigin folon me nin ikuk adi yadi kwetfolon kulema kekelune meeniŋdi kiutubuliwe titiŋdok saŋinin miŋit, tiŋa miknon wapum maan miŋit.

⁵ Kaŋ Dompa Mihinŋdi nipmek galikiliti 3 u kibidakulune nemek hatihatinit kunakunat 3-di indiŋ kutiguk. “Beŋ!” Yobu yali kawene kale wosi gouyeniŋ busuwaguk. Me nin sigin folon ikuk adi sigeli (tuwolit kameka) honeen

ikuk. ⁶ Kaṇ nu nemek hatihatihinit adi'walaṇ baṇamhik gineṇ meeniṇ mede nabugoṇ indiṇ yobune nadigut. “Pandiṇ bet kuyaniṇ eṇ palawa bet kuyaniṇ tuwaṇiṇ 40 kina, eṇ olif galik be wain ime adi yehitubukadaka mu tiṇa biyabune undugoṇ itneen.”

⁷ Kaṇ Dompā Mihiniṇdi nipmek galikiliti ku-nakunāt 4 kibidakulune nemek hatihatinit ku-nakunāt 4-di indiṇ kutibune nadigut. “Beṇ!”

⁸ Yobu yali kawene kale wosi folonamandap ku-muhaṇjindandi buguk. Me niṇ sigiṇ foloṇ ikuk adi'walaṇ wou adi Kumun. Ham gineṇ itougiṇdi hebeṇ foloṇ hinek kelen bugiṇ. Kaṇ kwetfoloṇ yowo lufomkulitniṇ hogok hatune kwet yowo noli wondok yobune, mikdi, eṇ map wapumdi, eṇ yagit kadakaninṇdi, eṇ kale moihi miknitdi, meeniṇ yehitubu-kadakadok saṇiniṇ yemiṇiṇ.

Meeniṇ Bepaṇ'walaṇ mede doktiṇa udihiṇiṇ adi'walaṇ welehik yabuguk

⁹ Kaṇ Dompā Mihiniṇdi nipmek galikiliti ku-nakunāt 5 kibidakukuk. Unduṇ tubune meeniṇ Bepaṇ'walaṇ mede kamehatiṇa medeṇiṇ yohau-taune udihiṇiṇit adi'walaṇ welehik alta falipmen halune yabugut. ¹⁰ Adi kutifiyeen yogiṇ,

“Wapumnik, Saṇiniṇ Molom, du Uṇgoniṇ eṇ Biyagoṇ Molom. Du deniṇ kwetfoloṇ meeniṇ hatiṇ kibikoṇ yembaan, eṇ indi'walaṇ naṇgatnik diniṇ kibikoṇ wobuyembaan?”

¹¹ Unduṇ yobune dahidahi fafau molomolom yemdapmaan indiṇ yeniṇiṇ. “Tipilapilaye no-hiye undugoṇ widihikumumbune yokunathikdi

hidut tomboyoulune tuwot titinḡdok muninin
woom hatineen.”

*Kibikonḡ nai folonḡ nemek mintawaak wondok
mede*

¹² Kanḡ nemek ninḡ indinḡ kagut. Dompā Mihininḡ
adi nipmek galikiliti kunakunat 6 kibidakulune
kenim wapum tuguk. Kanḡ mele adi gouyenḡ
kabot siginḡ dagouyenḡ diwelak undininḡ tuguk,
kanḡ muyakip adi yadi nanḡat undininḡ tuguk.

¹³ Kanḡ hinantilamek heki adi sububadi kalip kaip-
muhi fedigolopmaune mainḡ, undunḡ kunumneninḡ
kwetfolonḡ maanḡ foginḡ. ¹⁴ Kanḡ kunum adi pepa
bilibeneyam undunḡ nabuḡonḡ bilibetnenḡ liweguk.
Enḡ kweboboe, enḡ kwet kambanḡit adi kwehik iit
tiinḡ bikabuḡa uginḡ. ¹⁵ Nemek undunḡ mintaune
kwetkwet mapme, enḡ me bombonḡi enḡ me tal-
itimenḡ tubune mik taginḡ, enḡ muneenḡ bombonḡ
fehinit, enḡ me sanininḡhinit, enḡ meeninḡ lolonḡnit,
enḡ fofonḡnit wanakanḡ hogohogok kwet be kawade
ginanenḡ hebi ila ¹⁶ kweboboe enḡ ham kutiyeninḡa
indinḡ yoginḡ. “Hidi manḡfoonḡ nihikufulanḡa ni-
hikamehebiune mapme pop ginḡenḡ itak adi’walaḡ
namanda folonḡ mu mintanim. Enḡ Dompā Mi-
hininḡ’walaḡ kwihita mu kanim. ¹⁷ Kwihitahik
dininḡ nai tilak doktinḡa meeninḡ nediyenḡ kelekuful-
lak?”

7

Meeninḡ demehik folonḡ youkudip tiyemginḡ

¹ Kanḡ nu daune diwenḡ anelo 4 yabugut, adi
yadi kwet dininḡ tunḡ 4 unḡonḡ yali kwetdininḡ sub-
uba 4 monḡoyakinḡ. Kwetfolonḡ, be imenḡwanḡ

folon, be bem folon sububadi mu feditdok undun tigin. ² Kan mele labulabunenjkade anelo nin labune kagut. Adi yadi Bepan Hatihati Molom adi'walaanin fek kame hatiguk. Kamen hatiṇa anelo 4 kwetfolon, en imengwan folon fana titindok yeninṇit adi kutihautaan indin yeninguk. ³ “Hidi kwetfolonbe, be imengwan folon, be bem folon fana pilap mu tineen. Indi timen Bepan'walaṇ metamṇiye demehik folon fek kame yemineem.”

⁴ Undun yobune meenin fekhinit'walaṇ kunakunat indin yobune nadigut. “Isilaehi'walaṇ bop ginenin 144 tausen fek kameyeminṇit. ⁵ Juda'walaṇ bop ginenin 12 tausen fekhinit, Luben'walaṇ bop ginenin 12 tausen, Gat'walaṇ bop ginenin 12 tausen, ⁶ Asa'walaṇ bop ginenin 12 tausen, Naftali'walaṇ bop ginenin 12 tausen, Manase'walaṇ bop ginenin 12 tausen, ⁷ Simion'walaṇ bop ginenin 12 tausen, Lewi'walaṇ bop ginenin 12 tausen, Isaka'walaṇ bop ginenin 12 tausen, ⁸ Sebulon'walaṇ bop ginenin 12 tausen, Josep'walaṇ bop ginenin 12 tausen, Benjamin'walaṇ bop ginenin 12 tausen.” Meenin undunṇi fekhinit tigin.

Meenin bop fee hinekdi Bepan'walaṇ heben folon yakin

⁹ Nemek u kanadi tubudapmaan nimbo kagut. Kawene metam kwetkwet indigon tuwot folonamandaphik mebimebi, mede waliniṇhik mebimebi, bop wapum hinek, meeniṇdi yokunatdok tuwot mon, undunṇi mapme pop en Domba Mihinin'walaṇ heben

folon yalune yabugut. Dahidahihik kweheyehi fafau hogohogok. ¹⁰ Tina kohohik ginen wonim hapmun monggo yali kutihautaan indin yogin, “Tutumbanik adi Bepanik, mapme pop ginen itak, adi’walaanin en Dompa Mihinin’walaanin.”

¹¹ Kan anelo hogohogok mapme’walaan pop en talitimen heki, en nemek hatihatihinit 4 yehikele-madina yakin, adi mapme pop heben folon maan duwokeneen Bepan niutumbaan indin yogin,

¹² “Biyagon, yonadifo, en wougigit hautanit, en nadinadi fulin, en youtumba, en wou wapum, en saninin, en fafane uyadi Bepanik halimilakdi haliminja woon halaak fafanenin. U biyagon.”

Adi yadi folofigita tina bulaningon nadigin

¹³ Kan talitimen heki adi’walaanin nin di nan-inadina yoguk. “Dahidahihik kweheyehi fafau hogohogok u nedi? Tina denahi bugin?”

¹⁴ Naninadiune mede indin tubu-udanemingut, “Me wapumne, uyadi da agan nadilan.”

Kan naninguk. “Adi yadi memik hekidi malabumun en folofigita wapum hinek yembune nadi hatige bugin, en dahidahihik Dompa Mihinin’walaan nangatdi youtewalandagin.

¹⁵ Undun doktina Bepan’walaan mapme pop heben folon hatinila helebufa tuwot Silonyotnin ginen tipilapilaye timiin. Undun tubune mapme’walaan pop ginen itakdi yamadi ila yoon tiyemilak. ¹⁶ Kan nanane imedok map kotigon mu tineen. Meledi be nemek nolidi foloohik mu yehidafigitawaak. ¹⁷ Mapme pop lekingon ginen Dompa Mihinin yatak adikuyen yabudokowaak

on. Tiŋa hatihati dinin ime dawinen yanagi uluwaak, en Bepan̄di yeniwihi tiŋa dautilitilihik hogohogok tumolokuyembaak.”

8

An̄elo 7 bai yemin̄gin

¹ Kan̄ Domp̄a Mihinin̄ adi nipmek galikiliti kunakunat 7 kibidakulune kunum ginen̄ medemedede be waliwali wabidapman̄ kabup hinek halune haf awa dok tuwot tuguk. ² U dapmaune an̄elo 7 Bepan̄ heben̄ folon̄ yakin̄ adi yabuluwene nolidi bai 7 yemin̄gin. ³ Kan̄ an̄elo nin̄di malin̄ goldi tigin̄ u tiŋa buŋa woon̄ silon̄ hemin̄ alta heben̄ folon̄ honeen̄ yalune hemundumundun̄e kwam fee ulugolomininḡ. Ulugolomimbune mapme pop heben̄ folon̄ dumun̄ hemin̄ alta goldi tutumbagin̄ ikuk wendok folon̄ kameen̄ Jesu nadisukilitimiin̄ heki'walan̄ ninadihik dut tomboyokuk. ⁴ Undun̄ tulune kohon̄ ginenin̄ mupmuk mundun̄ momoon̄ wondi Jesu nadisukilitimiin̄ heki'walan̄ ninadihik tubulodaune Bepan̄'walan̄kade loguk. ⁵ An̄elo adi undun̄ tiŋa dumun̄ hemin̄ alta folon̄ kudup finin̄ mongola malin̄nin̄ dahitokin̄a kwatnekulune foguk. Foune filimpit, en man̄inguhut,* en mun̄kulap en kenim tuguk.

An̄elo 4 hekidi bai fedilune kwetfolon̄ nemek mintaguk

⁶ Kan̄ an̄elo 7 bai yemin̄it adi bai feditdok tiulidokogin̄. ⁷ Tiŋa an̄elo kunakunat 1 adi bai fedilune gwi fifingobut, en kudup nan̄gatdut

* **8:5:** Man̄inguhut adi nemek figitan̄ be malabumun̄ nai ginen̄ mede u yoyam.

minobunjit wondi kwetfolon maguk. Maune kwet faki wapum nin kudup daan bem noli en kilihikit hogohogok kudupdi dadapmaguk.

⁸ Kan ajelo kunakunat 2 adibo bai fedikuk. Bai fedilune nemek nin kweboboe wapum undinin kudupnit imengwan wapum ginen kulune foguk. Kulune foune imengwan faki nin nangatnit tubudapmaguk. ⁹ Kan kale imenengi fee kumundapmagin, en muwage noli imengwan wapum folon yaugin fee kadakadapmagin.

¹⁰ Kan ajelo kunakunat 3 adibo bai fedikuk. Bai fedilune bamholina wapum nin adi kunum ginenin diliteleen kaman undinin danena ime dawi be ime min fee ginen foguk. ¹¹ Bamholina wou Buukaan Hinek. Undun doktina ime fee bukadapmaune meenin ime u naan muyengon kumugin.

¹² Kan ajelo kunakunat 4 adibo bai fedikuk. Bai fedilune mele, muyakip en hinantilamek fee folon haki mintaune hautahik faki gweheye tigin. Undun doktina hadapmo faki-kabe wendok tuwot mele mu diweguk, en timin undugon faki-kabe wendok tuwot muyakip en hinantilamek heki adi mu hautagin.

¹³ Kan daune diwen bagi suwaye wapum nin kagut. Adi yadi wahin folonin hinek hatinila indin kutihewodiguk. “Yakeee, yakeee, yakeee, ajelo lufomkulitnin adi’walan bai u fedilune meenin kwetfolon hatiin adi dedin tineen ee!”

9

Ajelo kunakunat 5 adi bai fedilune gihiwak

miknit mintagin

¹ Kaŋ aŋelo kunakunat 5 adibo bai fedikuk. Kaŋ nu hinantilamek niŋ kunum gineniŋ diliteleen kwetfolon founé kagut. Adi yadi bom fuliŋmaman diniŋ namokop uditdok yeme youdilitom miŋit.

² Kaŋ bom fuliŋmaman diniŋ namokop udilune mupmuk wapum labuguk, fiye kogi henene daan mupmuk lolak wondok tuwolit labuŋa loon melebe, be hamap wapum tehedapmaguk.

³ Mupmuk maanen adi gihiwak labuŋa kwetfolon magiŋ. Bepaŋdi saŋiniŋ yembune adi maŋgitalita nabuŋon metam yehisiune folofigita nadiŋiŋ.

⁴ Ala adi yadi kwetfolon kilihikit nanane, tite be bem hapmuŋ heki mik mu tiyemdok yonit, adi meeniŋ Bepaŋ'walaŋ fek demehik folon mu hakuk adi hogok mik tiyemdok yonit.

⁵ Ala yehisiune kumuŋdok moŋ ale, hogok muyakip 5 wendok tuwot yehisifigitadok yonit. Folofigita uyadi maŋgitalitadi nindiune nadiyam wondok tuwot.

⁶ Kaŋ nai uŋaniŋ meeniŋ adi kumuŋdok yoneen iŋŋon on, tuwot mu kumuneen. Kumunŋdok mohinek nadineen iŋŋon kumuŋdi tuwot mu yehitubu-lodawaak.

Gihiwak folonamandaphik diniŋ mede

⁷ Gihiwak uyadi kale wosi nabuŋon, mikme hekidi mikde unene tinahukuyemiŋ undihi hinek. Mebihik folon kulon goldi tinjit nabuŋon ikiŋ, namandahik adi meeniŋ namandap nabuŋon.

⁸ Dumuniŋhik adi kweheyehi, fafau tam mebihik dumuniŋ kweheyehi nabuŋon. Eŋ mahik kitili adi laion mahik kitili undihi.

⁹ Siyohik folon kweletalak kapadi tinjit nabuŋon

hakin. Papalihik dinin gigilit adi kalis gigilitnin nabugon. Kale wosi feedi mik ginen kalis fee yehiwodiyen kiyane tubune gigilit toin nabugon hinek. ¹⁰ Uyahik en mikhik adi mangitalita'wala undihi. Ukuyendi meenin yehisifigita hatilu muyakip 5 tibaak. ¹¹ Adi'wala mapmehik adi bom fulinmaman dinin anelo wapumdi hatilak. Judame hekidi wou Abadon yogin, en Gilik mede ginen adi Apoliyon yogin. En indi'wala mede ginen "fana wapum". ¹² Kan bagi suwayedi yakeee nai lufomkulitnin kutiguk, ala nin agan dapmalak, kan lufom kougon hogok hakamuk.

Anelo kunakunat 6 adi bai fedilune mikme bop fee hinek mintagin

¹³ Kan anelo kunakunat 6 adibo bai fedikuk. Fedilune dumun hehen dinin alta goldi tinj, Bepan'wala heben folon itak, mimim 4 ginen keleunit ¹⁴ unanin mede labuna anelo kunakunat 6 bai kameyakuk u indin ninguk. "Anelo 4 Yufeletis ime wapum ginen yehitehigin hatiin u fiyakuyemben." ¹⁵ Kan anelo 4 adi gulet, muyakip, melenai wondok folon kwetkwet meenin fee mumuyen u di hikumundok woom hatigin, adi-ku fiyakuyeminguk on. ¹⁶ Kan mikmehiye kale wosi sigin folon iitdok kunakunathik 200 miliyen undun yobune nadigut. ¹⁷ Meenin be kale wosi adi'wala folonamandaphik adi lihine ginen dabugon indin kagut. Meenin adi kweletalak giminin wip hinek, en balimnit, en gwagwanrit undihi monggo hatigin. En kale wosi heki'wala mebihik adi laion heki mebihik nabugon,

mahik ginenin adi kudup, en mupmuk, en tebe manin kuduphinit (salfa) labugin. ¹⁸ Kan kumon fotaba lufomkulitnin labugin wendi meenin fana kisan tigin (Metam fee mumuyen kumonin). ¹⁹ Kale wosi heki'wala saninin adi mahik ginen en uyahik folon hakuk. Uyahik adi mingembet nabugon, mebihinit. Wendigon meenin kisan yehitubu-kadakain. ²⁰ Kan meenin noli kumunkwane tulune bop nin fiit biyabugin adi yadi welehek mu tubutakalegin. En hatihati be titinhikdok nadiune kadaka mu tuguk. Mon, adi yadi yabap moihi ungon mongo hatigin. En bepan yalayaan welewele goldi, en silwadi, en aindi, en kawadedi, en bemdi tutumbagin u yeniutumbagin. Adi yadi kanadi mu tiin, en unat bunat mu tiin, ingon fiit yeniutumba hatigin. ²¹ Tina undugon mik-kwadi, en tubuhi, en kefile, en kubo, kadakanin undihi u mu wabigin.

10

Anjelo nin di mede yokwambunda hinek tuguk

¹ Kan anjelo saninin nit nin kunum folonin foune kagut. Adi yadi mulukwandi mumut timingin, en mebi folon kwembeke kudidi gwaiguk, namanda mele undinin, kayonyat kudupmebemit. ² Kohon di pepa kuyanin nin agan tanakiyenit kameyakuk. Kayon didimenin di imengwan wapum folon yaliguk en kayon kapmadidi kwetfolon yalina yakuk. ³ Yali wapumgon kutiguk, laiondi mede tolak nabugon hinek kutiguk. Kutibune munkulap 7 togin.

⁴ Mun'kulap toña mede yobune nadiña kudi youlit yonja tiluwene kunumnenin kutikuti nin nu'walañkade indin buguk, "Mun'kulap 7-di mede yonit u mu youlen, hogok namokop tubune halek." ⁵ Kan aņelo imengwan wapum folon en kwetfolon yaliña yakuk, adi kohon didimenin kunum folonkade kohodidim tiña mede yokwambundaguk. ⁶ Bepañ hatihatiniņ dapmandapmanit mokit adi nemenemek hogohogok yehitubuminta-dapmaguk adi'walañ wou folon tebiña indin yokwambundaguk, "Nai kotigon nimañ mu hatak. ⁷ Aņelo kunakunat 7-di baiñin fedilune mede tobaak, biyagon hinek nai uñaniņ Bepañ'walañ mede hebiniņ, koom kwanai-meniye polofet heki gigit yeninguk, wendiniņ foloon hinek mintawaak."

Aņelodi Jon pepa mimbu naguk

⁸ Kan kunum ginenin mede nadigut uñakon kotigon mintañ indin naniņguk. "Du woon aņelo imengwan wapum folon en kwetfolon yaliña yali pepa tañakiyenit kameyatak u tiben." ⁹ Unduņ yobune nu woon aņelo pepa honeen yakuk u namdok nimbene indin naniņguk, "Tiña na! Nawen kan kabakenen buukaan tibek en magenen adi kobañin simiņkupuk nabugon tibek."

¹⁰ Unduņ yonja agaņ pepa nambune nagut. Nawene mane ginen simiņkupuk nabugon kobaguk, ala kumuyewene kabatne ginen buka tuguk. ¹¹ Kan indin naniņgiņ. "Du meeniņ bop fee hinek, folonamandaphik en mede waliniņhik mebimebi, tiña mapmehiye aditok kigili mede kotigon yobaañ."

11

Jondi Bepañ'walañ Silonyot kamekadok ningin

¹ Kañ nuye kusek kameka kudinit nin namuñ indin naniñguk, “Du pilali Bepañ'walañ Silonyot, en alta kamekawen, tiña wendinin maanen hatinila Bepañ niutumba tiñ u yehikunalen.

² En Silonyot dinin wawali adi kameka mu tiben, hogok wabiune halek. Uyadi meenin Bepañ'walañ fekhinit mokit aditok wabiyeminjit. Biyagon kuyon, adi muyakip 42 hatinila Bepañ'walañ yokwet ungonin u fana tineen.

³ Kañ nu'walañ meyat lufom medene yohautadok yeninikulene metam wele tubutakale mu tineen aditok bulaningon wapum nadiña fiit melenai 1 tausen 2 handelet 60 hatinila meenin kigili mede yenindemeek.”

Meyat lufom'walañ mede

⁴ Meyat adi yadi bem olif en kamañ boidok kweli undihi, tiña adi kunumkwet dinin Mapme'walañ heben folon yakamuk. ⁵ Nebek ninđi meyat u memik tiyembaak adi yadi meyat'walañ mahik ginenin kudupdi labuñ yehidakumumbaak. Undun doktiña nebek ninđi memik tiyembaak adi yadi unduku tiña kumumbaak on. ⁶ Meyat adi yadi gwi talik tehep timindok saninin hayemilak. Undun doktiña adi yobune gwi mu ula hogok hatune kigili mede yohatidemeek. Tiña undugon, yobune imedi nanđatnit titindok saninin hayembaak. En kwetfolon yagit mebimebi mintaune kumun fotaba titindok yobune wondok tuwot

mintaneen. ⁷ Undun tin̄a Bepan'walaŋ mede yohauta hatilune naihiŋ dapmaune kale miknit bom fulin̄mamaŋ hineŋ gineŋ hatilakdi labuŋa adut mindobuŋa udihiŋkumumbaak. ⁸ Meyat u udihiŋkumumbune meeniŋdi dabahiyat u biyabune yokwet wapum diniŋ wawaliwen ungoŋ dahatemeek. Yokwet wendok yoyout e' 'Sodom' dut 'Isip' yonit. Wapumnik yokwet ungoŋ kolon̄dabek folon̄ ulune kumunguk. ⁹ Kaŋ kwetkwet meeniŋ fee folonamandaphik mebimebi, eŋ mede waliniŋhiŋ mebimebi wendi dabahiyat melenai lufomkulitniŋ eŋ faki hogokniŋ wendok tuwot hati yabukuwatneen. Tin̄a nolidi yehiwenefuladok yobune nolidi yenihep tineen. ¹⁰ Tin̄a polofet yakat adi meeniŋ folofigita kisaŋ yemiŋgumuk doktin̄a kibibo meeniŋ kwetkwet tonadifo tin̄a bombon̄di silon̄ kibikibi tineen.

¹¹ Ingoŋ on̄, melenai lufomkulitniŋ eŋ faki hogokniŋ dapmaune Bepan'walaaniŋ hatihati diniŋ munabulidi dabahiyat gineŋ foune kaikaan̄ pilakumuk. Pilalune meeniŋ adi yabuŋa boho tin̄a mamihik teleguk. ¹² Undun tulune kunum foloniŋ kutikuti wapum niŋ meyat adi'walaŋkade indiŋ foguk. "Hidi in̄on̄ labudemek." Kaŋ memikhiye adi yali yabulune mulukwan̄ maanen̄ kunum gineŋ logumuk. ¹³ Kaŋ nai un̄aniŋgoŋ kunum gineŋ lolune kenim wapum tuguk. Yokwet wapum gineŋ yot fee (1/10) golon̄ foon̄ yot fana tin̄a meeniŋ 7 tausen widihikumungin̄. Undun tubune mon̄kaan̄ meeniŋ kaipmun̄ hatigin̄di muntaan̄ Bepan̄ kunumneneŋ wou nintilogin̄.

¹⁴ Bagi suwayedi Yakeee nai lufomkulitniñ kutiguk, ala kunakunat lufom diniñ foloon agañ mintaguk. Kañ yonñ adi agañ kubugonñdok hogok hatak wadi pilap mintawaak.

Añelo kunakunat 7-di bai fedilune nemek mintaguk

¹⁵ Kañ añelo kunakunat 7 adibo bai fedikuk. Bai fedilune kunum folonñ baiham kakanñ togiñ. Tonña indinñ yogiñ,

“Kwet wapum i wanañ hogohogok Bepañ Wapumnik enñ kwanai-meninñ Kilistodi kahiledapmayamuk. Kañ adi kubugonñdi yodoko enñ yodidime kwanai youdihinit tihatiluwaak fafañeniñ.”

¹⁶ Unduñ tobune talitimenñ 24 Bepañ’walañ heberñ folonñ mapme pophik folonñ ikinñdi mulelem tinña duwokeneenñ foonñ hali Bepañ indinñ yonña ninadifo tinña niutumbaginñ,

¹⁷ “Wapum Bepañ, Sañininñ Molom, hatigunñdi hatilañ, indi du ganinadifo enñ ganiutumba tiyam. Du sañininñge wapum tanñakieune mintalak, unduñ tinña mapme kwanaige tububihila yodoko enñ yodidime kwanaige minñgonñ tubuhautalañ. ¹⁸ Meeninñ kwetkwet kwihita tiginñ doktinña dubo kibikonñ tiyemdok naige tilak. Tinña kumunñhinit’walañ mede yodapmanñdok nai dulalak. Tinña undugonñ tipilapilaye-megeye polofet heki, enñ meeninñ du nadisukilitigamginñ, enñ nadigambune loune gikinñgonñ tigamiinñ lolonñnit be fofonñnit tuwahik fofoonñ hinek yemdok

nai tilak. En kwet be metam kwetfolon inon yehitubu-kadakain heki adi kibibo yehitubu-kadakadok nai tilak.”

¹⁹ Adi undun tulune kunum folon Silonyot dil-itombune Bepan’wala yofolok dinin bogit wapum mingon hakuk. Kan nai unaningon filimpit, en maninguhut, en munkulap, en kenim, en fisingobut wapum hinek mintaguk.

12

Kunum folon tam nin yakuk

¹ Kan kotigon kunum folon kudi nin indin mintaguk. Tam nin yakuk, adi yadi meledi tinahukuliminjit, en kayon hapmenen muyakip ikuk. Kan hinantilamek 12 adi mebi folon kulun wele undun ikin. ² Ala adi yadi mihiwelenit, tin wapmihi nagitdok folofigita nadin yakawe kisan toguk. ³ Ala tam adi undun hatulune kunum folon kudi nin indin mintaguk. Uyadi fowa kakan nin mintaguk, folonamandapnin giminin wip hinek, mebi 7 en kelev 10. Mebi molo-molom folon mapme kulun ilaugin. ⁴ Kan uyan di hinantilamek noli (1/3) widihi mongo yakulune kwetfolon fogin. Fowa adi undun tikabu, tam wapmihi nagile tulune indin nadin woon kamadi hakuk, “Wapmihi nagilune tikumuye tibit.” ⁵ Tamdi wapmihi nagikuk uyadi mihi. Ala mihi wondigon tot fafanej malina hatina meenin kwetkwet yabudokodok ninjit. Undun doktina mihi mintaune nagiloon Bepan’wala mapme pop itaknen heben folon kamegin. ⁶ Kan tam adi momon kwet fiilen mauguk, ala unon Bepandi

melenai 1 tausen 2 handelet 60 wendok tuwot nanaŋe ime minŋtoi timineen yonŋa yokwet nin tiulidokoguk.

Sadaŋ kunum gineniŋ kelekulu foguk

⁷ Kaŋ kunum folonj mik wapum mintaguk. Aŋelo wapumhik Maikol eŋ aŋelonjiye adi fowa ula kelene meyout tigiŋ, kaŋ kibi fukuniŋ fowa eŋ aŋelonjiye adi maan meyout tigiŋ. ⁸ Ingon on, fowa meniye adi fafaŋe mu tigiŋ. Adi gweheye tubune kunum ginenj hatidok kameheyemiŋiŋ. ⁹ Biyagon hinek kuyonj, fowa wapum, miŋgembet komi, yabap moiniŋ heki'walaŋ talitimenhik wapum Sadaŋ, kwetkwet meeniŋ wele tubufit tiyemilak u tapmekulune kwetfolonj foguk. Ne tapmekula aŋelonjiye wanaŋ yehitapmekulune fogiŋ.

¹⁰ Unduŋ tiŋa kunum folonj kutikuti niŋ indin mintaune nadigut, “Bepaŋnik'walaŋ tubuloda, eŋ saŋiniŋ, eŋ yodakale eŋ yodidime kwanai, eŋ Kilistonj'walaŋ saŋiniŋ inakonj mintadakalelak. Notniye nadisukilitihinit'walaŋ memik, helemahelemaŋ helebufa tuwot Bepaŋ namanda folonj mebihik yohauta tiŋa yenintifo tilak, unakonj hinek tapmetikukiŋ. ¹¹ Adi yadi Domp Mi-hiniŋ'walaŋ naŋgat folonj ulodikilitiŋa Mede Mo-moonj muntamuntanit mokit yohautagiŋ doktiŋa fafaŋegiŋ. Unduŋ tiŋila hatihatihik mu kahi-legiŋ, adi kumuŋ titiŋdok munta mu tiŋa yodapmagiŋ. ¹² Unduŋ doktiŋa kunum hogohogok eŋ unonj itowiŋdi nadifo tineen. Ingon kwet dut imenŋwanj wapum, hidi dedin tidemek, oye'!

Yadi Kadakanin Molom agan hidi'walaŋkade fo-
hamulak. Biyagon hinek kuyon, nainin agan
dapmandok muninin tilak u kan kwihita kisan
hinek tilaknej ala."

Fowadi tam memik timinguk

¹³ Kan fowa adi kelekulune kwetfolon foon
tam mihi nagikuk u memik timinguk. ¹⁴ Undun
tuluguk kan tam u bagi suwaye papaliyat mim-
bune woleen momon kwet fiilen Bepan ne tiuli-
dokominguknej woon fowadok munta mokit
hatidok kameu uguk. Tina ungon hatilune
kadokoon katoilune gulet 3 en fakinin tuguk.
¹⁵ Adi undun tina momolune fowa adi min-
dan manin ginenin ime suwakulune foon ime
bedi tuguk uyadi tam uku ulawoti uundok
nadinja undun tuguk. ¹⁶ Ingon kwetdi tam ya-
hehewe timina, manin an tubune fowadi ime
suwakukuk hogohogok u ungon fodapmaguk.
¹⁷ Undun tubune fowa adi tamdok nadikwihitan
metamjiye widihiwene uguk. Biyagon hinek
kuyon, Bepan'walaŋ yodoko mede tagimneen
Jesu wou yohautain adi udihidok uguk. ¹⁸ Woon
imenngwan wapum dinin kin folon fosuwaan
yakuk.

13

Imenngwan wapumnenin kale miknit labuguk

¹ Kan yakaluwene imenngwannenin kale moinin
miknit nindi labuguk. Adi yadi mebi 7 en kelev
10, ala kelev indigon tuwot mapme kulon 10
ikin. Mebi folon adi wohiye youkudip tigin
haliugin. Wohiye wendinin mebi adi Bepan

nintifo tiŋa nimpekit tigiŋ. ² Kaŋ Kale Moiniŋ miknit kagut adi'walaŋ folonamandapŋiŋ adi mudi moiŋ wapum nabuŋoŋ, kayoŋ adi kale bea kayoŋ nabuŋoŋ, eŋ maŋiŋ adi laion maŋiŋ undiniŋ. Kaŋ Fowadi ne'walaŋ fafaŋeŋiŋ, eŋ mapme popŋiŋ, eŋ saŋiniŋ wapum hinek mindapmaguk. ³ Kale wondiniŋ mebi niŋ youlukumuŋ tigiŋ diniŋ wedebitnit nabuŋoŋ kagut. U wedeŋiŋ gilakaune kotigoŋ kedebaguk. Unduŋ doktiŋa meeniŋ kwetkwet kagitegitaken adut hinek hatigiŋ. ⁴ Tiŋa undugoŋ Fowa adi kale u saŋiniŋ miŋguk doktiŋa, meeniŋ kwetkwet Fowa mohinek niutumbagiŋ eŋ kale maan nintinaŋloŋ niutumbaan yogiŋ, "Kale adi dabuŋoŋ nediyeŋ hatilak. Eŋ nediyeŋ maŋoŋ timimbaak?"

⁵ Tiŋa sigitiŋalo mede eŋ medehaki yodok mindapmaguk. Tiŋa muyakip 42 kwanainiŋ hati titiŋdok nai timiŋguk. ⁶ Unduŋ tiŋa Bepaŋ ne, eŋ yolikweli, eŋ wou wapum, eŋ kunum foloŋ itowiŋiŋ wanakaŋ hogohogok medehaki yeniŋa kisaŋ yeniŋkadaka hatiluguk. ⁷ Tiŋa Bepaŋ'walaŋ metamŋiye titiŋhik didimehi mik-kwadi tiyemiŋa yehitiŋafo titiŋdok mindapmaŋit. Tiŋa kwetkwet meeniŋ folonamandaphik be mede waliniŋhik mebimebi wanakaŋ me bombongi tiyemdok saŋiniŋ miŋit. ⁸ Kaŋ kwetfoloŋ meeniŋ hogohogokdi, adi niutumbagiŋ. Meeniŋ wohiye Domba Mihiniŋ'walaŋ hatihati diniŋ pepa gineŋ mu youliŋit adi hogohogok kuyeŋ kale u niutumbaneŋ. Domba Mihiniŋ yoŋ adi koomkwaha kwet mu mintagukneŋgoŋ Bepandi ulukumuneŋ yodapmaguk. ⁹ Maginitdi mede i nadi-

wek.

¹⁰ “Nebek nin adi yot fafañenindok gigit tuguk adi yot fafañenin ginen fowaak. En nebek nin adi miknonđi youlukumundok gigit tuguk adi miknonđi youlukumundok.”

Biyagon hinek kuyon, Bepañ’walañ metam didimehi hidi nai uñaniñ nadisukilitihik hone-fafañeen gigne tiña hatineen.

Kwet maaneñnin kale nin labuguk

¹¹ Kañ kwet maaneñnin kale moiniñ miknit nin labune kagut. Adi yadi dompa mihiniñ nabugon keleuniñ muniñgon en tungumun. Ingon medeñiñ adi fowa nabugon wapum toguk.

¹² Kañ kale moiniñ miknit wendi kale timen labuguk’walañ namanda folon hatiñila adi’walañ sañiniñ folon kwanai tuluguk. Tiña metam hogohogok kwetfolon hatigin yeningigineune kale timen wedewai tiña gilakaguk adi mulelem timiñgin.

¹³ Kañ adi yadi undun tiña kudi wapuhi fee tuguk, tiña yobune kwetkwet meeniñ namandahik folon kunum gineniñ kudup foguk.

¹⁴ Biyagon hinek kuyon, adi kudi undiniñku titindok nadimiñit doktiña kale timen labuguk adi’walañ wou folon tiñila kwetkwet meeniñ hatiñ wele tubufit tiyemguk. Tiña undugon yenimbune kale wedewai tiña gilakaguk adi’walañ welewele tutumbagiñ.

¹⁵ U tutumbaan kambiyalune yatune kale moiniñdi mindañ labuguk aditok sañiniñ miñgin doktiña munabut fedidahimimbune kaikaan medemedede toguk. Undun tiña yobune meeniñ aditok mulelem mu timiñgin heki yadi

udihikumun tigin. ¹⁶ Tina meenin lolonit be fofonit, bombonhinit, be hambeep, bombongi be tipilapilaye-me, meenin hogohogok wanan yenimbune kohohik didimenin folon be demehik folon fek kamedapmagin. ¹⁷ Undun tina kale dinin fek mu mongo hatigin adi yadi nemek kibikibi titindok be tuwatuwa titindok kamehep tiyemgin. Fek won adi kale'wala wou be wou dinin kunakunat. ¹⁸ Nadinadi fulingon inon hatak. Meenin nin adi nadinadi nenobu halimiluwek kan kale kunakunatinin dinin mebi tubumintawaak. Kunakunat won adi kwetfolon me nin'wala kunakunat. Kunakunat uyadi indin 666.

14

Dompa Mihinin en kayonbopniye adi Saiyon kweboboe folon yakin

¹ Nu Saiyon kweboboe folon (Bepan'wala kweboboe) koti diween kawene Dompa Mihinin ungon yakuk. Tina meenin kunakunathik 144 tausendi adut wanan yakin. Demehik folon adi ne'wala wou en Beu'wala wou youkin. ² Undun hogok be yo nadinen! Kunum folonin gigilit wapum nadigut, uyadi ime hambem kuma ginen foon tolak undinin, be munkulap wapum tolak undinin. Ingon mede gigilit u nadiwene baiwagim nabugon tuguk. En meenin feedi baiwagim ulune tolak undinin nadigut. ³ Adi yadi mapme pop heben folon en nemek hatihatinit 4,

en talitimen heki'walaŋ hebehik foloŋ kap gitip-muŋ niŋ togiŋ. Kap uyadi meeniŋ nolidi tona-didok tuwot mu tuguk. Adi meeniŋ 144 tausen yehidaneen yehituwaan netok yabukahileguk, adi hogokdi nadidok tuwolit tuguk. ⁴ Biyagoŋ kuyoŋ, adi yadi tamwoi dut titiŋ hogoli mu tiŋa welehiŋ walaŋiŋ hatiŋiŋ. Adi hinek kuyen Dompā Mihiniŋdi hatilu katuwali kelehatiŋiŋ. Biyagoŋ hinek, adi yadi kwetfoloŋ metam gineniŋ yehituwaŋit, ala wendigoŋ nanaŋe kwanai kobut gineniŋ timentimeniŋ kitalak u Bepaŋdok siloŋ tiyam unduŋ nabugoŋ, meeniŋ kwetkwet hatiŋiŋ uŋaŋiŋ Bepaŋ en Dompā Mihiniŋdok timen-timeniŋ yehidaneen yehituwaan yanagikuk. ⁵ Tiŋa adi'walaŋ mahikdi yalaŋ mede nemu yogiŋ, adi yadi yomhinit mokit.

Anġelo lufomkulitniŋ'walaŋ kutikuti mintaguk

⁶ Kaŋ kawene Anġelo niŋ foloniŋ hamap gineniŋ hinek gwaŋ woleen uguk. Adi yadi meeniŋ kwetkwet, folonamandaphik en mede waliniŋhiŋ uŋgoniŋ uŋgoniŋ aditok Bepaŋ'walaŋ Mede Momooŋ moŋgoyem hatiguk. ⁷ Adi wapum hinek kutiŋa indiŋ yoguk, “Hidi yadi Bepaŋ nadimimbune loune gikiŋgoŋ timiyaneen. Biyagoŋ kuyoŋ, kibikoŋ wobuwobu naiŋiŋ dulalak. Kwetkunum, imenŋgwaŋ wapum, en ime dawi yehitubu-mintaguk adi wou nintiloŋ niutumba tiyaneen.”

⁸ Adi unduŋ kutiŋa ulune anġelo niŋdibo min-dan buŋa indiŋ kutiguk, “Babilon yokwet wapum pupuhenelak. Agaŋ pupuhene hinaka tilak!

Biyagon kuyon, yohi wahi unghidi meenin kwetk-wet siloda kadakanin u wain ime miknit nabugon yemtoiyagin.”

⁹ Undun kutina ulune ajelo kunakunat 3-di buna mede wapum yohautaan indin yoguk, “Nebek nin adi Kale Moinin ne-be, be welewelenin mulelem timimbaak, en demei folon be kohon folon adi’wala fek monggo hatibaak adi kibikon malabumun indin mintamimbaak.

¹⁰ Adi yadi Bepandi kwihitanin dinin wain ime miknit hinek, ime hinek dut mu minobunjit, u ne’wala kulufe ginen ulimimbune naan kudup fafajenin kawade hakatdi (salfa) ha-dalaknen foon daune folofigita dapmandapmanjit mokit nadiwaak. Won adi ajelo ungonin en Domba Mihinin adi’wala hebehik folon-ku mintawaak on.

¹¹ Kan kudupdi meenin undihi yehidahiune wendinin kudup mupmukdi youdihinit loluwaak. Ala meenin Kale Moinin miknit, en welewelenin mulelem timingin adi be, be wou dinin fek kame hatigin adi wala folofigitadi mu biyabaak. Undun doktina ikulema mu tina helebufa tuwolit folofigita tomboyoutnit hinek nadi hatiya-neen.”

¹² Biyagon hinek, nai unaningon meenin nadisukilitihinitdi Bepan’wala yodoko mede takalina Jesu’wala Mede Momoon u munta mu tina kame hatiin adi saninin tubumintaan fafane tina folofigita naditaune malabumun yendi mu yehitubu-gweheyewaak.

*Bepan’wala mede kamehatina kumiin
adi’wala mede*

¹³ Kaŋ kunum gineniŋ mede niŋ indinŋ mintaune nadigut, “Du mede i youlenŋ. Nai indidegoŋ tububihila, Wapum’walaŋkade ulodiŋa kumuneenŋ adi Bepaŋdi kahaŋ tiyemulak doktiŋa welemomoonŋ nadiyaneenŋ.” Unŋoniŋ Munabulidi indinŋ tomboyoola yoguk, “Biyagoŋ, adi kwanai tiguluguluŋe u dilitele kameŋa ikuleenŋ welemomoonŋ nadiiŋ. Ala nehi ulune titiŋ eŋ hatihatihikdi wanaŋ ulak.”

Kwetfolon meeniŋ nadisukilitihiniŋ hatiŋ yanagitdok nindidimeguk

¹⁴ Nu kotigoŋ wahinŋkade diwewene loune pilap hinek mulukwaŋ fafau niŋ mintaune kagut. Tiŋa mulukwaŋ foloniŋ meeniŋ niŋ ilune kagut. Adi yadi folonamandapniŋ adi Me Kobumuŋ nabugoŋ. Mebi folonŋ mapme kulunŋ goldi tutumbagiŋ mokoŋa ikuk eŋ kohoŋdi tahak maŋiŋ mikit hinek kame ikuk. ¹⁵ U yakaluwene Silonyotneniŋ aŋelo niŋdi fooŋ me mulukwaŋ foloniŋ ikuk aditok indinŋ kutiniŋguk, “Du tahakgedi moŋgotna boi tibeŋ. Biyagoŋ hinek, kwetfolonŋ kwanai hatak agaŋ tuwot kitaanŋ gilakalak doktiŋa moŋgoboŋ titiŋdok nai tilak.” ¹⁶ Unduŋ yobune mulukwaŋ folonŋ ikuk adi tahakniŋdi kwetfolonŋ kula uliŋila moŋgotna tuguk.

Kadakaninŋ titiŋ kibikoŋ tiyemdok nindidimeguk

¹⁷ Unduŋ tulune aŋelo niŋdibo kunum ginenŋ Silonyotneniŋ labuguk. Adi maanŋ undugoŋ tahak maŋiŋ mikit hinek honeenŋ hatiguk. ¹⁸ Adi bulune

noliniņ nin silon hemihemiņ alta ikuknenkade unjandin buguk. Adi yadi kudup kadoko hatilakdi noliniņ tahak maņiņ mikit honeeņ hatiguk u indiņ kutininguk, “Biyagon hinek, du tahakge maņiņ mikit kwetkwet waingile agan kitaan gimindaiņ ale filodokokut!” ¹⁹ Undun yobune aņelo noliniņdi tahak kulune wain foloon gilenit filopmadidapmaune maņiņ. Kaņ moņgola Bepaņ’walaņ kwihitaņiņ diniņ ufilifiliye kabot wapum maaneņ kulune fotelegiņ. ²⁰ Undun tiņa yokwet diniņ gimbahan gagayeņ yalifilifiliyeune naņgat gibitaņ labuguk. Labugelabuge imenņwan wapum tuguk. Uyadi kale wosi heki geņhik folon labu wehemilek wondok tuwolit tuguk. Tiņa kwet kweheyeņiņiņ 3 handelet kilomita wendok tuwot tokiņa hakuk.

15

Meeniņ kwetkwet bopneņ Bepaņ kap tomiņgiņ

¹ Kaņ kunum folon kudi muntaņ hinek nin kagut. Aņelo heki 7-di meeniņ kumun fotabadok nemek mikhinit 7 moņgo yaķiņ. Nemek u mindaņ mintaune Bepaņ’walaņ kwihita diniņ foloon mintadapmaņdok yonjit. ² Tiņa nin indiņ kagut, uyadi imenņwan wapum nin galas nabugon kudupmehem dut miņjobuņit. Ala meeniņ Kale Moiniņ’walaņ mede, eņ weleweleniņ, eņ kunakunatiņiņ u fafaņe tiņa kelekufakiņ, adikuyeņ imenņwan wapum galas nabugon adi’walaņ gagayeņ, Bepaņdi baiwagim yemguk beņa yalune yabugut. ³ Adi Bepaņ’walaņ tipilapilaye-meņiņ

Moses'walaŋ eŋ Dompā Mihiniŋ'walaŋ kap indin yonŋ togiŋ,

“O Wapum Bepā, Saŋiniŋ Molom, du kwanai lolonŋit eŋ magaligalinit tilāŋ. Meeniŋ mohok kwetkwet hatitawiŋ adi'walaŋ Mapme Lolonŋit, du'walaŋ talik didimeniŋ eŋ folonŋ hinek.
⁴ Wapum, du nediyeŋ gikiŋŋon mu tigambaak? Eŋ nediyeŋ wohoge mu youtumbawaak? Du kubugonŋi ungoniŋ hinek. Du tubudidime kwanai didimeniŋŋon tubune mebi dakalelak. Unduŋ doktiŋa meeniŋ mohok du'walaŋkade buŋa mulelem tigamuyaneŋ.”

Aŋelo 7 maliŋhinit mintagiŋ

⁵ Kaŋ nu daune diweŋ kawene kunum folon Silonŋyot yeme dilitomunŋuk. Yot wonŋ adi yofolok mede diniŋ yot. ⁶ Dilitombune aŋelo 7 meeniŋ kumuŋ fotabadok nemek mikhinit 7 monŋola hatigiŋ adi Silonŋyotneniŋ labugiŋ. Adi yadi dahi-dahi walaŋiŋ fafau dahiŋa hatigiŋ, eŋ siyohik folon kiyegelep goldi tiŋit wendi youkilitigiŋ.
⁷ Kaŋ nemek hatihatihinit 4 yakiniŋ adi'walaaniŋ niŋdi aŋelo 7 maliŋ 7 goldi tutumbaniŋ u molo-molom yemŋuk. Maliŋ maaneŋ adi Bepā hati-hati fafaŋeniŋ molom diniŋ kwihitadi tokiguk.
⁸ Kaŋ Silonŋyot maaneŋ Bepā hautaniŋ diniŋ eŋ saŋiniŋniŋ diniŋ mupmukdi labuŋa tokidap-maguk. Kaŋ aŋelo 7 heki'walaŋ meeniŋ kumuŋ fotabadok nemek mikhinit 7 mu tubumintadap-magiŋ doktiŋa nebek niŋdi Silonŋyotneŋ lolonŋdok tuwot mu tuguk.

16

Bepañ'walañ kwihita malin 7

¹ Kañ Silonyotnenin kutikuti wapum nin indin labune nadigut. Uyadi aņelo 7 indin yeninguk. “Hidi woañ malin 7 kwatneune Bepañ'walañ kwihitadi kwetfoloñ fowek.” ² Kañ aņelo kunakunat 1-di woañ malin ginenin nemek kwatneune kwetfoloñ foguk. Foune meenin Kale Moinin'walañ wou kamehatigin eñ welewelerin mulelem timingin adi wede mebimebi kadakahi hinekdi foloohik foloñ mintayemgin.

³ Kañ aņelo kunakunat 2-dibo malinjin ginenin nemek kwatneune imengwan wapum ginen foguk. Foune imengwanđi naņgat eñ meningitnit nabugoñ tuguk. Unduñ tubune imengwan wapum ginen nemenemek hatihatihit kumundapmagin.

⁴ Kañ aņelo kunakunat 3 adibo malinjin ginenin nemek kwatneune ime dawi eñ ime min ginen foune naņgat tubudapmaguk. ⁵ Unduñ tubune aņelo ime kadoko kamenitdi indin yobu nadigut,

“Didimenin eñ Uņgonin Molom, hatigunđi hatilañ. Kibi tobonin yodapmañ medege didimeninon yolañ. ⁶ Adi yadi kayoñbopgeye eñ polofetgeye'walañ naņgat tubukadakagin doktiña kibibo naņgat ingoñ yemtoiune nain. Unduñ tiyembune tuwot hinek tilak.”

⁷ Kañ altadi mede indin yobu nadigut, “U biyagoñ. Wapum Bepañ, Saņinin Molom, kibi tobonin yodapmañ medege adi biyagoñ eñ didimenin hinek.”

⁸ Kañ aņelo kunakunat 4-dibo malinņin ginenin nemek kwatneune mele ginen foguk. Uņon foune mele dinin kudup gibitan daan meenin kisan yehidaguk. ⁹ Meenin adi mele kudutņinđi yehidaune, Bepaņdi yobune nemek miknit unduņ mintaguk adi'walaņ wou ninķadakagin. Tiņa welehiķ mu tubutakaleeņ Bepaņ mu nintilogin.

¹⁰ Kañ aņelo kunakunat 5-dibo malinņin ginenin nemek Kale Moinin'walaņ mapme popņin ginen kwatneune foguk. Kwatneune foune yolik-weli mambip tubudapmaguk. Unduņ tubune meenin adi folofigita fulinņon hineķ nadiņa mahiķ sikiliti tigin. ¹¹ Untinila folofigita eņ wedehiķ doktiņa Bepaņ kunumnenin nimpeķit tiņa nisuwambat tigin. Unduņ tiņa welehiķ mu tubutakaleņ, titin be hatihatihik kadakanin u mu wabigin.

¹² Kañ aņelo kunakunat 6 adibo malinņin ginenin nemek kwatneune Yufeletis ime wapum ginen foguk. Foune ime naņgakuk. Uyadi talik mintaune mapme mele labulabunenķadehidi bubuņdok unduņ tuguk. ¹³ Kañ nu yali yabuluwene fowa'walaņ maņin ginenin eņ Kale Moinin maņin ginenin, eņ polofet yalayalaņ maņin ginenin yabap moihi lufomķulitņin, hawom nabuņon labugin. ¹⁴ Adi yadi yabap foloon. Kudi wapum titinđok saņinin hayemilak. Adikuyeņ mapme kwetķwet hatiin yenihohokeneune Bepaņ Saņinin Molom'walaņ nai wapum folon mik titinđok meyout tiņa buņa mindobu tineeņ. ¹⁵ "Indin hineķ nadinen! Nu yadi kubome nabuņon kaka

busuwawaat. Ale tiyaugene nebek nin adi hambiyek tinja mekawaakneñ, ala nadinjale haulenjin tinahukutdok tiulidokoon hatiluwaak. Undun tibaak adi Bepandi nadifo tinja kahan timimbaak.”

¹⁶ Tobonin indin, yabap moinin heki adi kwet nin wou Judahi'walañ mede folon Amagedon yogin ungon mapme yehibopnedapmagin.

¹⁷ Undun tulune añelo kunakunat 7 adibo malinjin ginenin nemek hamap folon kwatneune foguk. Kañ Silonyotneñ mapme pop ikukneñkade mede nin indin foguk, “Agañ tuwot tilak.”

¹⁸ Undun yolune filimpit, eñ munkulap, eñ manjinguhut, eñ kenim wapum hinek tuguk. Meenin koomkwaha hatitalabuginneñ undinin nemu tuguk. ¹⁹ Undun tubune yokwet wapum tawaan lufomkulitnin tuguk. Eñ meenin kwetkwet hatiin adi'walañ yokwet wapuhi pupuhenedapmaguk. Eñ Babilon yokwet mebi'walañ molohiye adi yadi Bepañ ne titinhik yabunadiña nadikwihitayemiña wain ime fafañenin miknit yeminguk.

²⁰ Tinja nai unaningon kwet kambangit eñ kweboboe wanañ liwedapmagin. ²¹ Eñ kunum ginenin gwi wapum ukuk, gwi folon adi sububa tinja kawade bigim nabugon mintañ,* meenin udihiune folofigita nadiña Bepañ nimpekit tinja nisuwambat tigin. Gwi sifo wapum hinek ula fana kisañ tiyemguk.

17

Tam nin kale giminin folon ikuk

* **16:21:** Malabumunghik adi 45 kilo.

¹ Kaŋ aŋelo 7 malin 7 beyaugin adi'walaanin ninɗi nu'walaŋkade buŋa indin naninguk. “Kefifile tam hogoli hinek wounit ime wapuhi folon itoulak adi kibikon mintamimbaak u ganimbe kawen. ² Yakalan! mapme kwetkwet hatiin adi yadi adut kefile tigin, en meenin kwetkwet hatiin adi adi'walaanin siloda dinin wain ime naan nadibubuye tigin.” ³ Undun nanimbune Ungonin Munabulidi saninin nit hinek fotokina-muŋa kwet filen nanagila uguk. Kaŋ uŋon tam nin kagut, adi kale moinin nin giminin folon ikuk. Kale foloon folon wou fee youkudip tigin di tokiŋa hakin. Wou wendinin mebi adi Bepan nintifo tiŋa nimpekit tigin. Kale wondinin mebi 7 en kelev 10. ⁴ Kaŋ tam wen adi dahidahi giminin en timbitimbit kudi-di dahin hatiguk, en tinahukutinin adi gol, en kawade kudinit en komkom filimpitpitnit tuwanin lolon nit, undihidi tinahukula hatiguk. Tiŋa kohon di malin nin goldi tutumbagin honeen yakuk wondinin maanen adi siloda kadakanin dinin nemek dagidagiyeŋ, mundun kadakanin, undinin di fotokiguk. ⁵ Demei folon wou hebinin indin youkin hakuk, “Babilon yot mebi wapum, siloda tiŋa kefile titin dinin min na inakon. Wendigon kwet tubumadimadike tilak.” ⁶ Undun tiŋa tam adi metam nadisukilitinit en Jesu wou yohautagin adi'walaŋ nanŋat nage nage nadibubuye tubune kagut. U kaŋ boho kisaŋ tugut.

Kale mebi 7 wondinin mede

⁷ Kaŋ aŋelodibo indin yon naninadiguk, “Maŋon de boho kisaŋ tilaŋ? Nu tam yeŋ'walaŋ

mebi ganimbe nadiwen. En kale mebinin 7 en kelev 10 nitdi hekilak adi'wala mebi hebinin ganindakalewe nadiwen. ⁸ Du kale moinin kanan uyadi koomkwaha hatiguk, nai indidegon mu hatilak, kaugon adigili kon fulinmaman ginenin labuna kumuliwe kwetnen fowaak. Kan koomkwaha hatiguk, nai indide mu hatilak, hatigene udaneen baak u meenin kwetfolon hatiin di kan yobedibediye tineen. Wohiye kwet tububihila mintaguk nai unaningon hatihati fafajenin dinin pepa folon mu youlinjit, meenin adikuyen undun tineen.

⁹ “Yon adi nadisu-fulingon tina mebi nadidok tilak. Mebi 7 adi kweboboe 7, tamdi wihila itak ukuyon. ¹⁰ Kan kweboboe 7 wondi mapme 7. Ala mapme 5 agan mintan hatibune dapmaguk. Nin kobuk hatilak, en kubugon nin kougou hatige mintawaak. Adi yadi mintan nai muninin-kabe hatidok ninjit. ¹¹ Kale koomkwaha hatiguk, nai indinde mu hatilak, adi mapme 7 hangalan yatuwat tiin adi'wala nohik, ala adut tomboyoulune kunakunat 8 tibaak. Tina kumuliwe kwetnen fowaak.”

Kale kelev 10 wendinin mede

¹² “Kale kelev 10 yabunan adi maan mapme 10 kougou mintan kwanai tineen, ingon adi yadi kwanaihik tububihila kale moinindut nai muninin-kabe tineen. ¹³ Adi nadisuhik kiu-lune kubugon tubune saninin hik en wohikgigit kale moinindok min tipilapilaye kwanai gigin tina tineen. ¹⁴ Undun tina Domba Mihinindut mindobu tineen. Ingon Domba Mi-

hiniñdi mapme heki'walañ Mapme Wapum eñ loloñnit heki'walañ Loloñnit doktiña adi fafane tiña widihiwaak. Biyagoñ hinek kuyoñ, metam adut wooñ mik tineenñ adi yadi Dompamihiniñdi yabukahileen yahaneguk doktiña mede didimeningoñ nadikilitiña kelegin."

Tam'walañ mede

¹⁵ Unduñ yona tomboyoula indin naninguk, "Kefifile tam adi ime wapuhi wendok folon ilune kañañ, ime uyadi meeniñ bop mohok, folonamandap eñ mede waliniñ mebimebi hatitawiin. ¹⁶ Tiña kelev 10 yabunañ, adibe, be kale adi wanañ kefifile tam kakwihitanñ utubukadaka-hinakanñ dahidahi bombonñin lom moñgodapmaanñ, gomñin naañ kitili eñ gitnem kudup ginenñ heneenñ. ¹⁷ Tiña u hogok mu tineenñ, Bepañdi welehik tubulodaune adi medeniñ takaliña welekubugoñ tubudapmaanñ kale tipilapilaye timineenñ. Biyagoñ kuyoñ, unduñ timiña hatilune Bepañ'walañ mede foloñnit tubudapmawaak. ¹⁸ Tiña tam kañañ woñ adi yokwet wapum. Ala adi'walañ mapmedi kwetkwet diniñ mapme hogohogok yabudokoune tipilapilaye timindok sañiniñ halimilak."

18

Babilon yokwet wiyapupuhenedok mede

¹ Anelodi unduñ yodapmaune nu anelo nin kunum gineniñ foune kagut. Adi yadi loloñnit hinek tiña hautañinñdi kwet tubuhautadapmaguk.

² Adi wapum hinek kutiña indin yoguk,

“Babilon yokwet mebi wiyapupuhenelak! Wiyadapmanj hinek tilak. Adi yabap kadakahi heki’walaŋ yohikwehik tilak. Yotmuluŋ uyadi gintaluŋ eŋ bagi nemek madimadikehi naindi itowiŋ. ³ Meeniŋ kwetkwet buŋa keffileniŋ diniŋ wain ime fafaŋeniŋ nayagiŋ. Mapme kwetkwet buŋa adut keffile tiyagiŋ. Biyagoŋ kuyoŋ, Babilonhidi titiŋ kadakanin mekanit mokit kisaŋ tigiŋ doktiŋa kwetkwet bombongi me wapuhi buŋa bombonj tuwadok boiyembune tuwaune muneen bombonj loloŋnit tubumintagiŋ. Unduŋ doktiŋa wiyapupuhenelak.”

Yot mebi uyadi Bepaŋ’walaŋ mede doktiŋa ula heheŋdok

⁴ Kaŋ kunum gineniŋ kutikuti indin foune nadigut. “Manemaneye, hidi yokwet u bikabuŋa momonen. Uŋoŋ hatiŋa adi’walaŋ kadakaninjin tubulodaneenen. Tiŋa undugoŋ nemek miknitdi hidi-foloŋ lowaaknen doktiŋa hanilat. ⁵ Yokwet wendi kadakanin kainiŋ bebeli tiŋa lolu lolu kunum wehemit tilak. Unduŋ doktiŋa Bepaŋ adi yomniŋ u kaŋ nadidapmaan yolak. ⁶ Unduŋ doktiŋa kibi dedin tihamguk wendok tuwolit timineen, tiŋila kibi tiŋalooŋ kiulaŋa wapumgoŋ timineen. Kibikoŋ adi ne’walaŋ maliŋ ginen ungoŋ tiŋaloloyen mineen. ⁷ Sigitiŋalo tiŋa kap miyemiye tiŋa tonadifo tihatiluguk wendok tuwolit utubufigitaneen. Unduŋ tiŋa welebulaniŋ kisaŋ tubumintamineen. Adi netok nadiune loloŋnit tubune indin yolak. Na yadi tam loloŋnit, nu tam kahat moŋ, nu yadi nadifo foloŋ

hogok hatiluwaat. ⁸ Undun yolak doktiņa mele-nai kubugon folon hogok adi'walaņkade nemek miknit mintamimbaak: kumon, kobulabulaye, en map wapum. Undun tiņa kudup ginen daliwe-waak. Biyagon kuyon, Wapum Bepan adi Saninin Molomdi yomņin undugon wobumindapmalak."

Kwetkwet me bombonņi en adut menot mo-moon tiginđi kobulabulaye timineen

⁹ Undun yonā indin tomboyoula yoguk. "Kaņ kwetkwet mapme buņa adut kefile tigin en hinamuni tiņa kap miyemiye tiyagin, adi yadi kudup mupmukņin loune kaņ bulaningon wapum nadiņa kobulabulaye tineen. ¹⁰ Tiņa kwat-nangon yali nemek mulapmun mintamimbaak u kaņ munta kisan tineen. Tiņa indin yoneen, 'Yakeee! Yakeee! yot mebi! Babilon, du yok-wet fafaņenin ingon on, titin kadakaninge dinin kibikon nai muningon-kabe ginen ingon pilap hinek busuwagamalak!'

¹¹ "En yokwetkwet me bombonņi heki adut menot tiginđi indin yoneen, 'Nediyen bombonņik tuwaneen?' Undun yonā kobulabulaye tineen. ¹² Bombon kibikibi tigin u nemek inolok, gol en silwa, en fukut tuwanin loloņnit, en haule kudikudihinit hogohogok, fafau en giminin, yaņamuhi en bulubuluyehi, en bem mundunhinitdi nemek tutumbagin, en elefan kelehikdi nemek tutumbagin, en bem momohi tuwahik loloņnit hinekdi, en aindi, en kapadi, en kawade kudikudihinitdi nemenemek tutumbanit. Bombon undihi tuwadok boiune tuwagin.

¹³ Tiņa bombon noli indihi: sinamon gitnem, en

subat galik, en hemundumundune kwam momoon, en haguwo mundun momoon*, en wahu mundun momoon, en wain ime, gip, naso, en subat, mantam, tinja dompa, makau, wosi, kalis, en meenin tipilapilaye tuwanjit mokit titindok maanjon tuwadok yapmeune tuwagin.

¹⁴ “Kan yon adi bombonge mohok yabukwek-wene hatigun u agan dapmahinakaguk. Tinja ime wodisilansilange silidaguk, en tinahukut kinononge fikuk, dedin tinja kotigon mintagambaak.

¹⁵ “Kan noliniye nemek undihidi kibikibi tinja muneen bombon wapumnit tigin adi kwatnanjon yali nemek malabumun folofigitanit mintamimbaak u kan muntaan kobulabulaye tinja indin kutinineen, ¹⁶ ‘Yakeee, yakeee, yot mebi! Du dahidahige kudikudinitdi dahidondopnegun, en tinahukut mebimebi tuwahik lolonjit wendinin maanen itoulugun! ¹⁷ Yadi bombon mohokge nai muninjon-kabe fana kaka tinjit.’

“Tinja undugon muwage molohiye, en me muwage folon kwanai tinila imengwan wapum folon unat bunat tiin, en metam muwage folon yawagin, adi maan kweetnin yali ¹⁸ kudup mupmuknin loune kan makat koyone tinja indin yoneen, ‘Bulaninjon, yokwet wapum indininjon noli dinjon itak?’ ¹⁹ Undun yonja kwam gomuna kobulabulaye en yomalabuda tinja indin yoneen, ‘Yakeee, yakeee, yot mebi! du kwanai tugun doktinja muwage molohiye muneen bombonjit

* **18:13:** Wou “mel” yoin.”

tigin. Kan yon adi gehingehin hinek yokwet kwampupu mintalak.’

²⁰ “Kunumnehi en Bepan’walaŋ metam, aposel en polofet heki, hidi yadi welemomoon nadiŋa nadifo tineen. Biyagon kuyon, yot mebi wendi hiditok yom tihamguk wondok kibikon Bepan di tubudapmalak.”

Yokwet mebi u kwet bilebile en kwampupu hogok hahatdok yoguk

²¹ Mede unduŋ mintaune aŋelo saŋiniŋnit niŋdi kawade bigim wapum tubupilali imenŋwan wapum ginen kulune foguk. Foune indiŋ yoguk,

“Babilon yokwet mebi undigon waanin kuhebidok, kan liwedapman tibaak. ²² Kan baiwagim toto, gita uut bop adi’walaŋ mahik gigilit u du’walaanin kotigon mu mintawaak en kohohikdi nemenemek momoon tutumbain u du’walaŋkade wabidapman tibaak. Kan unon kwanai titotitonit mokit kwet bilebile halaak. ²³ Du’walaŋkade kamaŋ kotigon mu dahautawaak, en metam hekimalam kobut tiŋa mede yogege undugon mu mintawaak. Du’walaŋ me bomborŋhinitdi kwetkwet me wohik wapumnit hatitaugin en du’walaŋ tubuhidi meenin kwetkwet welehiŋ tubufikuk, ²⁴ tiŋa polofet en meenin nadisukilitihinit en kwetkwet meenin udihiŋit adi’walaŋ naŋgat dinin yom u du’walaŋkade hatak doktiŋa unduŋ tigamdok.”

19

Kunum folon tonadifo mintaguk

¹ Anelodi mede unduŋ yodapmaune nu kunum gineŋ meeniŋ bop wapumdi mede haam toin undiniŋ nadigut. Kaŋ adi wanakaŋ hogohogok indin toŋ.

“Haleluya, Wapumnik niutumbanim! Tutumbanik eŋ wougigit hautanit eŋ saŋiniŋ wapum uyadi Bepaŋnik’walaŋkade hatak.

² Adigoŋ yomdok kibikoŋ tubu-udaneyembune foloŋ tilak eŋ tuwot hinek tilak. Kefifile tam loloŋnit adi kwetkwet meeniŋ siloda talikŋin yenindidimeeŋ yehitubu-kadakaguk adi’walaŋ yomŋindok kibikoŋ timiŋguk. Unduŋ tiŋa Bepaŋdi metamŋiye’walaŋ naŋgat diniŋ yom diki hakuk u tubudapmaguk.”

³ Unduŋ yona kotigoŋ gicineeŋ toŋ,

“Haleluya, yot mebi kudupdi daune adi’walaŋ kudigedi helemahelamaŋ youdihinit lowaak.”

⁴ Kaŋ Bepaŋ adi ne’walaŋ mapme pop foloŋ ilune talitimen 24 eŋ nemek hatihatihinit 4 adi foŋ duwokeneeŋ hali indin yona niutumbagiŋ,

“U Biyagoŋ! Haleluya! Wapumnik niutum-banim!”

⁵ Unduŋ tulune mede nin mapme pop ikukneŋkade indin buguk,

“Bepaŋ’walaŋ tipilapilaye-meniye, hidi wanaŋ niutumbaneŋ. Biyagoŋ kuyoŋ, loloŋnit be fofoŋnit, gikiŋgoŋ timiin hogohogok hidi unduŋ tineŋ.”

Dompa Mihiniŋ’walaŋ gulet momoon

⁶ Kaŋ nu tonadifo gigilit wapum koti nadigut. Uyadi imeham hambem kuma foloŋ foŋ tolak

nabugon, en munjulap nabugon nadiwe kutikuti indin mintaguk:

“Haleluya, Wapumnik niutumbanim! Wapum Bepanik, Saninin Molom, adi yodidime en tubudidime kwanainin mingon tububihitak. ⁷ Undun doktina indi welemomoon nadinan niutumbanim. Domba Mihinin’wala nadifo nai tilak en aditok gigit hatiin di tiulidoko agan tinj. ⁸ Adi yadi dahidahi fafau, walanin hinek en holiholinen tinahukula hatidok nadiyeminj.”

(Wapum’wala metamniye, ne nadisukilitin tin didimenin tigin, wendigon dahidahihik tilak.)

⁹ Kan anelodi mede nin indin naninguk, “Du indin youlen. ‘Domba Mihinin’wala kohokukut dinin tonadifo nai folon hinamuni ginen nanane nanandok yeniyehimanejit, adi yadi Bepan ka-han tiyembune welemomoon nadin.’” Undun yon yaguk, “Biyagon kuyon, mede ganilat yon adi Bepan’wala mede foloon hinek.”

¹⁰ Undun nanimbune nu mulelem timin niutumbawit yo tugut kan mon nanina yaguk, “Undun mu tiben! Nu yadi tipilapilaye noke. En nokeye munta mu tin Jesu’wala medenin nadisukilitin kamehatiin, adi’wala nohik. Du yadi Bepan ne hogok niutumbawen! Jesu’wala mede nadisukilitin kamehatiin uyadi Ungonin Munabuli’wala kigili mede.”

Jondi Jesu en mikmenjiye yabuguk

¹¹ Kunum dilitombune nu diween kawene wosi fafau nin yadiweguk. Kan sin folon ikuk adi’wala wou adi “Mede biyagon molom.” En

wou noli adi, “Mede nadiguk tuwolit gweheye mu tin̄a tilodapmaguk.” Adi yadi kibikon̄ wobuwobu en̄ mik adi didimeningon̄ hinek tubune tuwot tilak. ¹² Dawiyat adi kudupmebem undihi, mebi folon̄ mapme kulon̄ fee ikin̄. Tin̄a wou youkudip tin̄it uyadi ne kubugon̄ kunali nadilak. ¹³ Dahidahin̄in̄ kweheyenin̄ ala nangat ginen̄ fulan̄it, tin̄a adi’walan̄ wou adi “Bepan̄’walan̄ Man̄in̄ Mede” yon̄it. ¹⁴ Adi ulune kunumnehi mikme mohomohok adi wosihiye fafau folon̄ ila mindan̄ keleen̄ utelegin̄. Dahidahihik adi fafau en̄ walahi hinek. ¹⁵ Man̄in̄ ginanen̄ adi miknon̄ mikit nin̄ labuguk, wendigon̄ meenin̄ hogohogok kwetkwet widihin̄a yehitubu-didimewaak. Undun̄ tin̄a tot fafan̄en̄ malin̄a hatin̄a yabudokowaak. Undun̄ tin̄ila Bepan̄, San̄inin̄ Molomdi’walan̄ kwihita min̄gon̄ tubumintaan̄ kibi tobonin̄bo yodapman̄ kwanai tibaak. ¹⁶ Dahidahin̄in̄ lekin̄gon̄ folon̄ en̄ baan̄ folon̄ wou indin̄ youkin̄ hatak, “Mapme heki’walan̄ Mapme Wapum, en̄ lolon̄nit heki’walan̄ Lolon̄nit.”

Jesu’walan̄ man̄in̄ ginenin̄ mededi memiknjiye widihidapmawaak

¹⁷ Kan̄ nu daune diwen̄ an̄elo nin̄ mele folon̄ yalune kagut. Adi un̄gon̄ yali bagi hogohogok hamap ginen̄ wole hatigin̄ wapum hinek ku-tiyenin̄a yoguk, “Bepan̄’walan̄ hinamuni wapum mintalak doktin̄a bun̄a bopnedapmanen̄. ¹⁸ Tin̄a mapme heki’walan̄ foloohik gom, en̄ mikdok talitimen̄ tin̄in̄ heki’walan̄ foloohik gom, en̄ me fafan̄jehi’walan̄ foloohik gom, en̄ wosi,

en mikmehiye'walaŋ foloohik gom, tiŋa meeniŋ hogohogok, me bombonŋi en tipilapilaye, en lolonŋit, en fofonŋit, adi'walaŋ foloohik gom nadapmanenŋ.”

¹⁹ Kaŋ nu Kale Moiniŋ adi kwetkwet diniŋ mapme hogohogok, en mikmehiye bopnedapmaune yabugut. Adi yadi me wosi fafau folonŋ ikuk, ne en mikmeniye widihine bugiŋ. ²⁰ Inŋonŋ, Kale Moiniŋ en adi'walaŋ polofet yalayalaŋ adi gweheye tugumuk. Polofet yalayalaŋ adigoŋ Kale Moiniŋ'walaŋ namanda folonŋ kudi mebimebi tiŋila meeniŋ Kale Moiniŋ'walaŋ wou kamehatigiŋ, en weleweleniŋ mulelem timiŋgiŋ u wele tubufit tiyemguk. Kaŋ Kale Moiniŋ en polofet yalayalaŋ adi kaipmunŋ kayohik kohohik yehi-ibidokoonŋ yobo moŋgo yakulune kalasindi imenŋwanŋ nabuŋonŋ kudup hadalaknenŋ* unŋonŋ fogumuk. ²¹ Noli hogohogok adi yadi wosi fafau folonŋ ikuk adi'walaŋ maŋiŋ ginanenŋ miknoŋ mikitdi labuŋa widihidapmaguk. Kaŋ baŋi hekidi buŋa foloohik gom natoki hinek tigiŋ.

20

Sadaŋ yot fafaŋeniŋ ginenŋ kameneenŋ

¹ Tiŋa kawe kunum gineniŋ aŋelo niŋ foguk. Adi yadi bom fuliŋmamaŋ diniŋ yeme youdilitom en tawa fafaŋeniŋ (sen) kakaanŋ niŋ honeenŋ ti buguk. ² Tiŋa biyagoŋ kuyonŋ,

* **19:20:** Mede wondok adi Gilik mede ginenŋ “Salfa kawade hakatdi imenŋwanŋ tiŋa kudup fafaŋeniŋ dalak” youkiŋ. Mede “Salfa” diniŋ mebi adi Diksineli pepa yendiniŋ fawinenŋ unŋonŋ kedem kawenŋ.

Fowa, mingembet komi, kadakanin molom, wou Sadan yoyam, adi honekufale tawa fafaenenin di ibikilitina gulet 1 tausen ibikilitinit hahatdok nindapman³ bom fulinmaman ginen tobo tukulune foguk. Founé talik tehemina tubukilitihinakaan nipmek fafaenenin di galiheguk. Undun timimbune meenin hogohogok weletubufit kotigon mu tiyemina hatilune gulet 1 tausen dapmandok ningin. U dapmaune tawa fafaenenin fiyakulimbune labuna nai muninin-kabe hatibaak.

Meenin nadisukilitihinit adi timen pilatneen

⁴ Tina kawé mapme pop ituwat tubune mehinek mede yodapman titindok saninin yemunjit adi pop wendok folon ikin. Ala adi Jesu medenin yohautanila Bepan'wala mede munta mu tina hautan gon kamen hatibune kodihik ulopmadigin adi'wala welehi yabugut. Tina Kale Moinin nebe, be welewelenin mulelem mu timingin, en wou demehik folon be kohohik folon mu youkin, adi'wala welehi maan yabugut. Meenin uyadi foloohik maan kaikaune yabugut. Kan adi Kilisto dut mapme kwanai tina metam yabu-ulidoko kwanai tihatilune gulet 1 tausen dapmaguk. ⁵ En kumuhi noli hogohogok adi mu kaikagin adi yadi gulet 1 tausen dapmandok woom hakin. Kan pilapilat u kagut adi pilapilat kunakunat 1. ⁶ Ala pilapilat kunakunat 1 folon youdihin adi yadi Bepandi kahan tiyembune welenadifo folon ungonin hatiin. Meenin undihi yadi kumun kunakunat 2-di yehitubu-silomut tibaak. Adi yadi Bepan en Kilisto'wala Silonyot

diniŋ talitimenŋ tiŋa hatineenŋ. Unduŋ tiŋa adut mapme mintaŋ metam yabu-ulidoko kwanai hati tulune gulet 1 tausen dapmawaak.

Sadaŋ adi yot fafaŋeniŋ biŋa labuŋa meeniŋ wele tubufit kotigoŋ tiyembaak

⁷ Ala gulet 1 tausen dapmaune Sadaŋ adi tawa fafaŋeniŋ u fiyakulimimbune yot fafaŋeniŋ gineniŋ kotigoŋ labaak. ⁸ Labuŋa kwetkwet fukuŋ be fukuŋ, wahinkade be kumaŋkade meeniŋ hatitawiŋ welehiŋ tubufilaak. Gok diniŋ bop eŋ Magok diniŋ bop yenintubulodaan yeningigineune mikdok meyouŋ tiŋa buneenŋ. Meeniŋ buneenŋ adi'walaŋ kunakunat adi imengwaŋ wapum gagayenŋ kiŋ itak wondok tuwolit, tuwot mu kunadapmandok. ⁹ Kaŋ adi kwatnaŋgoŋ buge buge busuwaanŋ kwet gutuŋ wapumnenŋ uŋgoŋ looŋ meeniŋ nadisukilitihiniŋ kweleyouhep tiyemgiŋ. Kweleyouhep tiyemiŋa Bepaŋdi yokwet momooŋ kahileguk (Jelusalem) u maanŋ kelemadigiŋ. Unduŋ tulu kudup kunumneniŋ fooŋ yehidakumuŋ-dapmaŋ tuguk. ¹⁰ Eŋ Sadaŋ wele tubufit tiyem hatilak ne yadi kalasindi imengwaŋ nabugoŋ kudup hadalaknenŋ* uŋgoŋ tobo tikulune foguk. Kale Moiniŋ eŋ polofet yalayalaŋ adi wanaŋ uŋgoŋ hatigumuk. Ala adut tomboyoula helebufa tuwot folofigita dapmandapmaŋnit mokit, youdihiniŋ kisaŋ hinek hati-nadiyaneenŋ.

* **20:10:** Mede wondok adi Gilik mede ginenŋ “Salfa kawade hakatdi imengwaŋ tiŋa kudup fafaŋeniŋ dalak” youkiŋ. Mede “Salfa” diniŋ mebi adi Diksineli pepa yendiniŋ fawinenŋ uŋgoŋ kedeŋ kawenŋ.

Kougon mindan pilali kibikon mongotdok

¹¹ Nu mapme pop wapum fafau nin kagut. Wendok folon ikuk adi'walaŋ namanda folon kwet kunum liwegumuk. ¹² Kaŋ kumuŋ tigin, lolonŋit be fofonŋit adi wanakaŋ hogohogok mapme pop heben folon yalune yabugut. Adi ungon yalune pepa mohok tanakiyegin. Tiŋa nin tanakiyegin adi hatihati fafaŋenin dinin pepa. Kaŋ kumuhi adi yadi kaipmuŋ hatinila titinhik tigin wendinin mede, pepa ginen youlinŋit u kaŋila medehik yodapmagin. ¹³ Kaŋ nai unanigon imengwan wapumdi adi'walaŋ maanen meenin kumuŋ tigin unon hakin u yehitubu-udaneguk, en kumuŋdi undugon meenin kumuhi yehitubu-udaneguk, en hamdi undugon meenin kumuhi yehitubu-udaneguk. Unduŋ tubune kumuhi hogohogok adi hatihatihik dinin mebi yeninŋawan kibikon mede yenindapmanŋit. ¹⁴⁻¹⁵ Unduŋ tiŋa kumuŋ dut kumuhi'walaŋ kwet (ham yoyam) adi imengwan kudup ha-dalakneŋ mongo yakulune fogumuk. Kaŋ metam hatihati fafaŋenin dinin pepa ginen wohiye mon yolohigin heki adi imengwan kudup ha-dalakneŋ mongo yakulune fegin. Wendi kumuŋ kunakunat 2 tilak.

21

Kwetkunum kobuli mintawaak

¹ Yoŋ adi kunum kobuli en kwet kobuli yabugut wondinin mede. Ala indin, kunum komi en kwet komi adi yadi liwe tugumuk. En imengwan wapum adi maan liwe tuguk. ² Kaŋ yokwet

ungoniņ, Jelusalem kobuli kuyon, kunum gineniņ Bepaņ’walaaniņ foune kagut. Wabihem niņ me dut yehikiutdok tinahukut tiyemiņ unduņ mo-hinek tutumbaaniņ tinahukulimiņiņ kagut. ³ Kaņ mapme pop ginenkade kutikuti wapum niņ indin buune nadigut, “Biyagon hinek kuyon, u kalan be. Bepaņ’walaņ yolikweli agaņ metam dut hatak. Ne lekingonhik ginen itoune metamdi adi’walaņ metamņiye tiņa itouneen. Bepaņ ne adut hatinila ⁴ dautilitilikhik tumolokudap-mawaak. Kumuņ be bulaniņon be weyakawe be yagit folofigita uņon mu mintawaak. Biyagon kuyon, nemek komi hogohogok agaņ uņaniņ dap-mawaak.”

⁵ Kaņ mapme pop folon ikukdi indin naniņguk, “Nadilaņbe, nu nemek hogohogok kobuli tubu-mintalat.” Unduņ yonā yoguk, “Mede yon adi biyagon eņ foloon hinek ale youleņ.”

⁶ Tiņa adi indin naniņguk. “Agaņ tubudap-manjit. Nu yadi timen hatigut eņ mindaņ hati-baat, tububihit eņ tubudapmaņ. Nebek niņ adi imedok maņiņ galiwaak adi nu hatihati fafaņeniņ diniņ ime dawinen gila tuwaņit mokit hogok mintoiwaat. ⁷ Nebek niņ adi fafaņe titawoon tubudapmawaak adi yadi nemek i kahilewaak, kaņ na Bepaņniņ hatibe adi mihine hatibaak. ⁸ Ingoņ on, munta kelewodiņ eņ nadisukiliti mu tiņ, eņ kadakanin kaka tiņ eņ mik ulap, eņ meeniņ kefile mebimebi tiņ, eņ meeniņ up-muņ eņ tubuhi moņgo hatiņ, eņ kwet yabawen nadisukilitiņa bepaņ yalayaļaņ moņgo hatiņ, eņ yalaņ mede mebimebi moņgo hatiņ, meeniņ undihi hogohogok’walaņ yokwet adi kalasindi

imenḡwan nabuḡon kudup ha-dalakneḡ* unḡon hatidok yodapmagut. Uyadi kumuḡ kunakunat 2-kuyonḡ.”

Jelusalem kobuli kunumneniḡ fowaak

⁹ Anḡelo 7 malinḡhik indigonḡ tuwot nemek miknit fotokiune monḡo yaḡinḡ, adi’walaaniḡ niḡdi nu’walaḡkade buḡa indinḡ naniḡguk. “Buune Dompā Mihiniḡ’walaḡ tamgigit ganimbe kawenḡ.” ¹⁰ Unduḡ nanimbune Unḡoniḡ Munabulidi saḡiniḡnit hinek fotokinamuḡa nanagila kweboboe wapum kweheyeniḡ niḡ folonḡ loonḡ yokwet unḡoniḡ Jelusalem u kunum gineniḡ Bepaḡ’walaaniḡ, foune nanimbu kagut.

¹¹ Bepaḡ’walaḡ hauta holiholiniḡ wondi yokwet u hauta miḡguk. Yokwet wendiniḡ hauta adi kawade Saspa, tuwaḡinḡ wapum, walaḡinḡ hinek tiḡa filimpitpit tuguk. ¹² Tiḡa gimbaḡaḡ adi kawadedi foloniḡḡonḡ hinek ibikelemadigiḡ. Gimbaḡaḡ wendiniḡ talifofonḡ adi 12, tiḡa talifofonḡ indigonḡ anḡelo kubuḡonḡ kubuḡonḡ foloniḡ ila uune kunakunathik 12 tuguk. Enḡ talifofonḡ indigonḡ tuwot Isilae metam bophik 12 adi’walaḡ wohik youlinḡit haliulak. ¹³ Mele labulakneḡkade talifofonḡ 3, enḡ fukuḡinḡ kwet kumaḡkade talifofonḡ 3, enḡ fukuḡinḡ kwet wahiḡkade talifofonḡ 3, enḡ fukuḡinḡ mele folakneḡkade talifofonḡ 3. ¹⁴ Gimbaḡaḡ wendiniḡ kawade daḡiniḡ hakiliti adi 12. Kaḡ kawade daḡiniḡ hakiliti 12 folonḡ

* **21:8:** Mede wondok adi Gilik mede gineḡ “Salfa kawade hakatdi imenḡwan tiḡa kudup fafaḡeniḡ dalak” youḡinḡ. Mede “Salfa” diniḡ mebi adi Diksineli pepa yendiniḡ fawineḡ unḡon kedem kawenḡ.

lekingon Domba Mihinin'walaŋ aposel 12
adi'walaŋ wohiye youlinjit.

*Aŋelo ninđi Jelusalem kobuli tuwolitnin kamek-
aguk*

¹⁵ Kaŋ aŋelo mede naninguk adi kameka
dinin kusek nin goldi tutumbagin honeen yakuk.
Wendi yokwet eŋ talifon eŋ gimbaŋnin
kamekaguk. ¹⁶ Yokwet wendinin tunenjin 4,
kolonjin be dabekjin tuwolit kubugon. Kaŋ
aŋelodi yokwet u kelemadiŋa kusek kamekanjin
kamekaune 2,200 kilomita tuguk. Kaŋ kolonjin
eŋ dabekjin eŋ kweheyenin u tuwolit kubu-
gon hogohogok tubudapmaguk. ¹⁷ Kaŋ gimba-
haŋ bateyenjin dok tuwolit kamekaune 70 mita
tuguk. Meeninđi kameka beŋa hatiyam un-
dinin gon aŋelodi honeen hatiŋa yokwet kamek-
aguk.

¹⁸ Gimbaŋa uyadi kawade Saspa, walaŋin
hinek, filimpitpitnit wendi tigin, eŋ yot heki
adi gol, galas walaŋi diwetom tiyam undininđi
tigin. ¹⁹ Gimbaŋa wondinin daninin hakiliti adi
kawade mebimebi tuwahik lolonjit, adi'walaŋ
wohik eŋ famahik hebet indin halifolak. Daninin
kunakunat 1 Saspa uyadi giminin.† Daninin
kunakunat 2 Sapaiya uyadi balimnit. Daninin
kunakunat 3 adi Agate. Daninin kunakunat 4 adi
Emelat. ²⁰ Daninin kunakunat 5 Oniks uyadi fama
mebimebinit. Daninin kunakunat 6 Kanelien

† **21:19:** Kawade wohiye hogok in gon youkin eŋ famahik be
namandahik yohebet Diksineli ginen yaben. Adi pepa hapmun
“Kawade momoon tuwaŋin lolonjit hinek” un gon hakiin.

uyadi giminiŋ. Daŋiniŋ kunakunat 7 Kilisolait uyadi gwagwanŋit. Daŋiniŋ kunakunat 8 Belil uyadi balimnit. Daŋiniŋ kunakunat 9 Topats uyadi gwagwanŋit. Daŋiniŋ kunakunat 10 Kilisopaluse uyadi kaikailen. Daŋiniŋ kunakunat 11 Sasinti uyadi balimnit inŋon haŋindaŋ. Daŋiniŋ kunakunat 12 Ametis uyadi timbitimbit. Kawade undihidi gimbahan daŋiniŋ hakiliti boiŋa ibikele-madigiŋ.

²¹ Talifofon 12 uyadi fukut[†] tuwahik loloŋnit 12 wendi boigiŋ. Talifofon niŋ fukut molomŋon, talifofon niŋ fukut molomŋon unduŋ hogohogok yambiyakiŋ. Yot talik adi gol waliniŋ hinekdi kamegiŋ, galas ginen diwedapman tine ulak undiniŋ.

²² Bepaŋ'walaŋ Silonyot adi yokwetneŋ uŋon mu ilune kagut. Wapum Bepaŋ, Saŋiniŋ Molomdi Silonyot tiyemilak eŋ Dompa Mihiniŋdi maan tiyemilak. ²³ Tiŋa yokwet uyadi muyakipbe, be meledi hauta mu yemilak. Bepaŋne'walaŋ hauta holiholiŋedi hautayemilak eŋ Dompa Mihiniŋdi hautaŋiŋ tilak. ²⁴ Meeniŋ mohok yokwetkwet hatitauneŋ adi yokwet wendigoŋ hautayembaak. Kaŋ kwetkwet mapme hatiŋ adi yadi bombonhik kedehi u mongola yokwet uŋon udapma-neŋ. ²⁵ Yokwet uyadi mu bufawaak. Hadapmo

[†] **21:21:** Fukut adi nemek kuyaniŋ-kabe doktiŋa mede i nadiŋa undiniŋ-kabe mu yonŋ nadidok. Yon adi nemek undiniŋdi wapum kakaan hinek. Ala wendi Bepaŋ'walaŋ yokwet diniŋ talik yeme tiŋit. Fukut u denŋon mongokiŋ? Uyadi imenŋwan maaneŋ foŋ kale wou kalamsel yoŋ u monŋo labuŋa kufulahik taŋakiyeŋ u yabuŋa mongokiŋ.

hogok halaak doktiņa gimbahan wondiniņ tali-fofoņ adi hamap hogok yatneen. ²⁶ En meeniņ hogohogok adi'walaņ bombon tuwaņiņ loloņnit, nemek momohi, eņ kobahi u yokwet uņoņ mongo udapmaneņ. ²⁷ En nemek gengenit adi uņoņ mu hinek fowaak. Be meeniņ niņ adi nemek mekaningon eņ madimadikengon tibaak be yalaņ niņ kame hatibaak adi maan yokwet uņoņ mu yalikawaak. Wohiye Domba Mihiniņ'walaņ hati-hati diniņ pepa gineņ youliniņit adi hogokdi yokwet u kahileneen.

22

Bepaņ'walaņ hatihati ime eņ hatihati bem

¹ Anelodi ime wapum hatihatinit u titinenenambune kagut, woņ adi waliniņ hinek galas gineņ diwedapmaņ tiyam undiniņ. Uyadi Bepaņ eņ Domba Mihiniņ adi'walaņ mapme pop mebineniņ bulak. ² Labuņa yokwet wapum lekiņon tali haliulak-tabe ulak. Kaņ hatihati bem adi ime gagayeņ fukufukuņ yaliwiin. Bem wondiniņ foloon adi muyakip 12 indigon tuwot mintaan gimindaiņ. En meeniņ kwetkwet hatiin adi bem wendiniņ hapmuņ naan kedebaneen. ³ Yokwet uņoņ adi nemek Bepaņdi yobune hakinit tigiņ hogohogok adi uņoņ mu hatneen. Bepaņ eņ Domba Mihiniņ'walaņ mapme pop uņgon hinek itune metamniye adi tipilapilaye kwanai hati timineen. ⁴ Tiņa undugon adi'walaņ folonamandapniņ kaņila hatineen, eņ adi'walaņ wou demehik folon mintaan halaak. ⁵ Yokwet uyadi bufa mu tibaak. Unduņ doktiņa kamaņ

be meledi diwehautadok mu yoneen, Wapum Bepan ne hautayembaak. Kan adi mapme tija metam yabu-ulidoko kwanai helemahelman hati-tineen fafajeni.

Mede hogohogok i foloon mintadok nai dulalak

⁶ Kan aelodi indin naniŋguk “Mede yon adi foloonnit en biyagon. Wapum Bepandi polofet heki Uŋgoni Munabuli dahiyembune welehi tubutakalelak adi aelonin niŋkulune tipilapilaye-meniye hidi nai muninin-kabe hatitalolune nemek mintadok yonit u hanindidimeguk.”

⁷ Jesudi yoguk, “Nadila be, nu aga pilap bene tilat. Ala nebek nin adi pepa yendinin maanen kigili mede youlinit, u didimeningon kame hatilak adi yadi Bepandi kahan timimbune nadifo en welemomoon nadiluwaak.”

⁸ Nu Jon, nukuyen nemek i kanadi tubudapmagut. Kanadi tubudapmaan aelo nenenemek nanimbihidapmaguk adi'wala heben folon foon duwokeneen niutumbawit yo tugut kan naniŋguk, ⁹ “Undu mu tiben! Nu yadi tipilapilaye-me noke, en polofet nokeye'wala nohi, en pepa yendinin mede gitagon boihatineen adi'wala nohi. Du yadi Bepan hogok nadimina niutumbawen.” ¹⁰ Undu yona indin naniŋguk, “Du pepa yendinin kigili mede wobukufula tija tubukiliti mu tiben. Biyagon hinek, mede yendi foloonnit titindok nai aga muninin hinek tilak. ¹¹ Undu doktina neen kadakanin tihatilak adi kadakanin undugon hati-tuluwaak, en welen gengeŋnit adi undugon

welen gengenit hatiluwaak. En titin didimenin tiin adi yadi tomboyoula titin didimenin taneen. En nebek nin adi Bepandi youtewalandaguk undun nadin walani hatilak kan walaningon hatiluwaak.”

Jesu ne Jon mede ninguk

¹² Nadilan be, nu agan pilap hinek bene tilat. Kibi tobonin nit buja meenin hogohogok hatihati en titinhik dinin kibikon tuwolit didimeningon hinek yodapmawaat. ¹³ Nu yadi timen hatigut en mindan hatibaat, mebi en boki, tububihit en tubudapman. ¹⁴ Dahidahihik youtewalandan adi Bepandi kahan tiyemulak dokti na nadiwe utumbalak. Biyagon hinek, adi yenimbe hatihati bem dinin foloon naneen ti na gimbahan wendinin talifofon ginen woon yokwet maanen foneen. ¹⁵ Gimbahan maginen fakan kade adi indihidi hatineen: kamo heki, upmun sitnan en tubuhi boihatiin en meenin kefile tiin, en me udihikumun tiin, en kwet yabawen nadisukiliti na welewele tutumbaen bepan yalayalan monggo hatiin en yalandok nadiune foloon tilak.

Jesu ne yoguk, “Dewit’wala yalaki na inakon”

¹⁶ “Jesu, nagon anelone nin kulene adibo kayonbopneye hidi na’wala mede hanihautaguk. Biyagon hinek, nu yadi mundinin kobuli Mapme Dewit’wala yalaki ginen mintagut ti na undugon nangat dikiin hinek, ti na nu yadi helehele dinin bamholi na hautan hinek.”

¹⁷ Munabuli en Jesu'walaŋ tam gigitdi indin yoyamuk. “Du beŋ!” Ala nebek niŋ adi mede i nadiŋa undugoŋ yobaak, “Du beŋ!” Nebek niŋ adi imedok maŋiŋ galiune kedem baak. En nebek niŋ adi wendok nadikaan buŋa hatihati fafaŋeniŋ diniŋ ime tuwaŋit mokit nawaak.

Jondi Jesu'walaŋ yobihit mede yendok mute mede yoguk

¹⁸ Pepa yendiniŋ maanen kigili mede youtat i kunatnadi tineen, hidi mute mede hanimbe nadinen. U indin hinek kuyoŋ. Nebek niŋ adi ne'walaŋ nadinadi niŋ tubumintaŋ buŋa tomboyoulaak meeniŋ uyadi Bepaŋdibo nemek miknit mintadok pepa yendok ginen youle hatak u tomboyoulimimbaak. ¹⁹ En nebek niŋ adi kigili mede yendiniŋ diki tubuflaak adi yadi Bepaŋdibo hatihati bem diniŋ mede en yokwet uŋgoŋiŋ diniŋ mede aditok gigit yoŋit inoŋ hatak u lom mongolune nemu halimimbaak.

Mede yokahan

²⁰ Mede i yobihiliŋit u kasop tilakdi indin yolak. “U Biyagoŋ, nu pilap hinek bene tilat.”

U Biyagoŋ, Wapum Jesu, du bubuŋ hinek tiben.

²¹ Wapum Jesu'walaŋ siloŋ tobogoŋdi metam hogohogok, hidut haliwoon halaak.

**Bepan'Walan Folofolok Kobuli
Genesis, Exodus, Psalms, and the New Testament in
the Numanggang Language of Papua New Guinea
Sampela hap Buk Baibel long tokples Numanggang**

copyright © 2005 Wycliffe Bible Translators, Inc.

Language: Numanjan (Numanggang)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 11 Nov 2022 from source files dated 9 Oct 2020

217908e9-ce08-5ac3-9947-124c48579a74